


B₂-6-31

~~D. 4~~
I 190.



Rare Book & Special
Collections

945.07

B887c

v. 3²



CASTRUCCI
BONAMICI
COMMENTARIORUM

D E
BELLO ITALICO


LIBRI III. PARS II.



LUGDUNI BATAVORUM.


EDITIO PRIMA.

clō cl cc li.



Digitized by the Internet Archive
in 2012 with funding from

University of Illinois Urbana-Champaign



945,07
B887c
v.32



CASTRUCCII BONAMICI
COMMENTARIORUM
LIBRI III. PARS II.



ENUÆ plebs partâ victo-
riâ ferox Academiam Je-
suitarum, quæ est in Bal-
bâ viâ, sedem concilio suo
delegerat. Cujuscunque loci homines
arma ferre, pro portis, stationibusque
excubare cogebar, neque satis habere
videbatur expulisse Urbe Austriacos,
sed arcem euestigiò recipere Savonen-
sem contendebat; ad eamque rem,

Pars II.

A ij quan-

quantum gratiâ, auctoritate, pecuniâ
valebat, nobilitas nitebatur, exemplo-
que præibat. Comparatis cibariis, &
aliquot præmissis Reipublicæ militibus,
signum datur profectionis. Armata ce-
leriter magna convenit multitudo, fi-
duciaque plena proficiscitur. Hic co-
gnosci licuit, quàm vana sit animo-
rum alacritas nullo certo duce, atque
imperio firmata. Nam portis egressa
plebs, cum commeatus quosdam, im-
pedimentaue Austriacorum offendisset,
ad ea diripienda statim dilapsa est,
neque optimatum precibus retineri po-
tuit: illorum esse prædam, atque illis
reservari quæcumque Austriaci reli-
quissent: liberatæ patriæ gloriam ne
tenuissimæ modò spe prædæ contami-
narent. Non homines laus in fordi-
bus, tabernisque natos, non, soluto
legum metu, arrogantes pudor coer-
cet.

cet. Ipsa oberat opulentiorum liberalitas, qui plebem in captandis nummis occupatam segniorem largitione reddebant. Invitati prædâ longius procedunt populares, alique aliam in partem dissipati feruntur; atque ex tantâ properantiâ rem negligunt, quæ, perterritis Genuensium adventu Subalpinis, qui pauci erant, facilè perfecta maximæ fuisset ad omne bellum opportunitatis. Eò acrius, priusquàm auxilia concurrerent, oppugnant Subalpini, alias evocant copias, alias proferunt munitiones, vexare arcem telis, atque ollis incendiariis diem, noctemque non desistunt. Ac tandem, qui oppugnabantur, dejectis propugnaculis, labefactâ magnâ parte muri, adactò cuniculo, qui arcem subruerat, atque omnibus desperatis auxiliis, sese dedere coguntur; cum eorum virtus,

6 DE BELLO ITALICO ,
tus , Adurniique Præfecti constantia ab
ipsis esset hostium ducibus collaudata .

Auditis , quæ Genuæ acciderant ,
varius per universam Europam motus
fuit animorum . Aliis præclarum , ve-
terique Româ dignum , aliis periculo-
sum , nonnullis vix credibile videbatur .
Fractas Austriacorum spes , irritos in
Italiâ conatus gaudebant Borbonii Re-
ges , imprimisque Galliæ Rex , cujus in
finibus hostes versabantur , certosque
miserat homines Genuam , qui , quid
rei esset , cognoscerent , sibi que re-
nunciarent . Regina contrà Ungariæ
gravi commota casu Josephum Spinu-
lam Legatum Reipublicæ finibus ex-
cedere suis , & quæ essent in suo re-
gno bona Genuensium publicari , ob-
sidesque Mediolani in carcerem con-
di , & redintegrari statim bellum jus-
serat .

Botta perfidiam Genuensium, qui neque colloquii, neque induciarum jura servarint, suamque in illos indulgentiam prædicat, neque interim popularium animos literis, nunciisque tentare desistit. Deduci præfidiis, evocarique totâ Cisalpinâ Galliâ milites, atque ad se adduci jubet. Omnibus circa locis pecunias imperat; quos ad eos, qui erant e nobilitate Genuensi, agros pertinere cognoscit, illos habet prædæ loco, ut maximè irasci nobilitati videatur. Qui Genuenses, Liguresque arma posuerint, iis veniam pollicetur, reliquis malum denunciat. Quibus rebus confectis, levis armaturæ pedites, quorum magnum habebat numerum, præmittit, eisque, ut Ligusticas iterum fauces transcendant, imperat, injiciendique terroris causâ, omnia cædibus, incendiisque per-

permisceant. Illi primo impetu Rufcinone, Campoque frigido potiuntur, difficilesque alios, atque opportunos in illis montibus aditus occupant. Cum longius progredi vellent, ab Hieronymo Balbo Equite Jerosolymitano, qui eò, coactâ Ligurum manu, advolarat, repulsi sunt; & cum arcem Masoniam ad deditionem minis compellere tentassent, defendente Anfrano Saulio, non potuerunt.

Genuenses sua apud Langenses præsidia posuerant. Hostes subnubilam nacti tempestatem primâ luce ad Genuensium stationes, triplici instructâ acie, improvisò accedunt, Liguresque subitâ re, illatisque ignibus perterritos in fugam conjiciunt, Pontemque decimum occupant, ipsumque expugnare Langensium pagum summâ vi conantur. At Gaspar Badon-

fadonnius, qui Porciferæ valli præerat, eâ re nunciatâ, militum, Ligu-
rumque contractas copias ad Pon-
temdecimum ducit, Augustinumque
Pinellium, qui illi in itinere occurre-
rat, adoriri a latere hostes jubet.
Impetu factô, multis interfectis, lo-
co hostes pelluntur, depulsoſque ad
eorum usque munitiones Genuenses
insequuntur, atque ad Langensium
deinde pagum conversi, liberatis suis,
fugatis hostibus, in sua se præsidia
recipiunt.

Interea Genuæ Senatus, cum,
acceptâ ignominiâ & dilatâ ultione,
iratiores reverti Austriacos videret,
pro magnitudine periculi defensionem
parabat. Franciscum Auriam proficisci
in Britanniam jubet, qui cum Rege
agat, & in Genuensi tumultu nihil
publico factum consilio, populumque

licentiâ militum, vecordibusque ducum minis efferatum ad vim descendisse demonstret, atque omnibus, quibus possit, modis abalienatam malevolorum sermonibus Regis voluntatem ad pristinum erga Rempublicam studium revocare conetur. His acceptis Auria mandatis proficiscitur, commodâque per summam hyemem navigatione usus in Galliam exit Narbonensem, atque ex itinere Belinsulanum æstuantem dubitatione propter varios, qui de rebus Genuensibus effluebant, rumores ad submittenda auxilia Senatus nomine confirmavit. Lutetiam cum venisset, cognoscit ibi, ut in Britanniam transmitteret, impetrari a Britannix Rege non potuisse, quod gratissimum sibi quidem Genuensis Legati adventum fore, sed vereri diceret Rex, ne daret ea res an-

sam

ſam Auſtriacis ad ſuſpicandum . Quo
cognito Senatus optimum factu cen-
ſuit , Auriam in Galliâ remanere , fa-
ciles qui apud Gallorum Principes ,
Regemque ipſum Galliæ aditus habe-
ret . Legatis item aliis ſcriptum ab
Senatu eſt , ut Borbonios orarent Re-
ges , atque adhortarentur , ut celer-
rimè Reipublicæ ſubvenirent , quos
tamen ipſâ temporum inclinatione , re-
lictæque ſocietatis pudore , & com-
munis cauſæ curâ incitari exiſtimabat :
plurimumque ei rei extemplò profuiſ-
ſe certum eſt Joannem-Franciſcum
Pallavicinum , qui Reipublicæ apud
Galliæ Regem Legatus erat , & ſin-
gulari fidei ſolertiæque , exiſtimatione
floreat . Muros Urbis aut vetuſtate
parum utiles ad præſentis uſum belli ,
aut diuturnâ pace neglectos refici , &
communiri jubebat . Idoneos deligebat

homines, qui cives hortarentur omnes, ut suæ, & communis salutis causâ arma sumerent, breviq̃ue tempore tota est regionatim decuriata Civitas, nobilesque ipsi potentiores, omni in tantâ perturbatione sublato dignitatis discrimine, promiscuè describebantur. Nautas, mercatoresque in summâ caritate, quam prædatoria classis, & belli metus adauxerat, præmiis, atque immunitatibus alliciebat, ut essent, qui Britannos fallere, frumentumque in Urbem importare auderent. Pecunia deerat, hærebantque in eâ expediendâ Patres vehementer, cum & cives, universis imperatis pecuniis, ad tributi nomen obsurdescerent quotidie magis, & , Georgianâ exhaustâ mensâ, fides concidere publica videretur. Tum Brignolius Dux, de Senatus sententiâ, cum esset eâ de causâ Concilium

Minus coactum : Non rectè consuli
posse Reipublicæ , dixit , cum privati
ad consulendum sensus afferuntur . Si
Patriæ salutem , si ejus conservatæ
gloriam quærent , ingressi Concilium
obliviscerentur omnium suorum , cu-
ram abjicerent rei familiaris . Maximas
a majoribus ædificatas , ornatasque
classes , maximos esse factos privatim
sumptus , ut transmarinas imperio Ge-
nuensi provincias adjungerent : quid
posterius dubitarent , paululum conferre
argenti , non ut augeantur opes Rei-
publicæ , sed ne deleatur nomen ? non
ut hostem in longinquo Oriente scru-
tentur , sed ut a patriæ mœnibus ,
tectisque repellant ? nequicquàm pri-
vata servari , si publica conciderint :
eam esse Rerumpublicarum rationem ,
ut bona , malaque earum ad omnes
cives pertineant : oportere eos , qui
Rei-

Reipublicæ præsumt, omnia, quæ gerant, non ad propriam utilitatem, sed ad commune bonum conferre; æquissimumque porrò haberi, ut qui reliquis honore, atque opibus antecellunt, amore etiam erga patriam, & liberalitate præstent. Ego equidem, inquit, ad hunc principem locum, inclinâtâ belli fortunâ, cum vocarer, non eram P. C. tam ignarus rerum, ut multa Reipublicæ mala impendere posse, titubantibus sociis, auctis hostium copiis, non præviderem, eumque me fortasse futurum Ducem intelligebam, cui vigilandum præ cæteris, nullique rei pro Republicâ parcendum esset. Sed recreabat me præstantissima Senatus sapientia, ex cujus auctoritate ordinis Rempublicam gerere debebam, & tantum me, amplissimo præsertim accepto beneficio, patriæ

triæ debere existimabam, ut vitam, nedum pecuniam, ejus salutis causâ profundere jucundissimum ducerem. Hoc quidem tempore, quanquam & tempestas opinione meâ major coorta est, & omnia in tantis Reipublicæ tenebris, metuenda sunt, tamen eo sum animo P. C. ut neque deesse patriæ, neque superesse velim. Hâc Ducis oratione, & quòd extrâ ordinem habebatur (nam moribus Genuensium Duci verba publicè facere, nisi ex S. C. non licet) & quòd maximum fui, optimèque cælati argenti pondus ad Monetam deferri ipse jusserat, & voluntaria statim facta erat omnium Senatorum collatio, tanta innata est alacritas, ut adjuvandæ Reipublicæ certamen excitaret omnium animos, & pro se quisque factum, signatumque argentum contribuerent; Matro-
næque

næque ipsæ opulentæ, atque optimates, ne in amore patriæ suis cessisse viris viderentur, auribus gemmas, collo monilia detraherent, atque in publicum conferrent. Insignis cum primis extitit Augustini Gavotti, Josephique Duratii liberalitas, quorum alter iv. millia, xv. alter millia aureorum Reipublicæ donavit.

At plebs immoderatæ libertatis vitio insolescebat more suo, latrocinandique cupiditati defensionem patriæ, atque Austriacorum obtendebat odium. Simulans enim occultari bona hostium, domos scrutabatur, & multis se rebus pro patriâ pugnantem egere dictitans pecuniam precibus flagitabat, quibus contradici non poterat. Erant exploratores hostium, erant improbi, & scelerati homines, qui, turbatis rebus, seditionis, & prædæ cau-

causam quærent. Silebant leges: tacitus obsidebat curiam Senatus, neque illud esse tempus animadversionis existimabat. His malis hæc subsidia succurrebant, quominus omnis immutaretur status Reipublicæ, quod & honestiores populares seditiosis motibus adversabantur, optimèque de Republicâ sentiebant, & plebs partim illustrium familiarum splendorem, atque opes assueta mirari sui gregis sordes aspernabatur, partim lucro, prædæque addicta nihil de regno cogitabat; & mitissimi etiam, optimique nobilium imperii memor, comparatione deterrimâ præsentem tumultum fastidiebat; ejusque erant duces adeò rudes, ut regerentur magis plebis furore, quàm ipsi regerent plebem; apud eamque suspicione fraudis, & non æquabili prædæ partitione offenderant.

Itaque paucis diebus corruerant, magnoque erant odio omnibus. Adjuvabant rem proclinatam, qui vel a nobilitate submissi, vel plebejam ipsi per se pertæsi arrogantiam Senatus vigere auctoritatem, & remotis ducibus, plebis languescere insolentiam cupiebant. Quibus rebus extimulata plebs suapte naturâ mobilis, & temeraria repentè adorta est deprimere, quos paulò ante in cœlum extulerat laudibus. Latrones illos, hostes, proditores esse vociferabatur. Comprehenso, atque omni contumeliâ vexatos in Prætorium adduxerat, Senatumque, ut in eos animadverteret, obtestabatur. Illos statim Dux in carcerem duci jubet, & daturos pœnas affirmans a præsentì exitio subtrahit; monet deindè, quàm potest mitissimè, plebem, ut eorum ignoscat imperitiæ, qui

qui legum , & Reipublicæ gerendæ ignorantia peccaverint : non posse bene geri Rempublicam imperiis stolidorum . His dictis mitigata dilabatur plebs , Ducis mansuetudinem , & æquitatem collaudat . Illos postea Senatus , repetitis rebus , non modò iniquissimâ invidiâ liberavit , sed etiam honore habito declaravit , nihil esse ab iis unquam de Republicâ nisi optimè cogitatum . At plebs curarum , turbarumque tædio petit ab Senatu , ut alios sibi det duces , qui Concilio suo præsent , atque intersint . Itaque ex auctoritate Senatus delecti sunt nobiles iv. Joannes-Baptista Grimaldus , qui de omnibus rebus ad concionem referre consueverat , & Joannes Scalea , Jacobus Laumellinus , Carolus Furnarius . Horum facilitate , solertiâque permulcebatur multitudo ; his

auctoribus controversiæ minuebantur non dissentiente Senatu, cui suam obtinere auctoritatem nondum maturum videbatur. Erat plebs suorum magistratum imagine alacrior ad defendendam Rempublicam; & cum nonnulla periculosissimo tempore fieri oporteret, quæ abhorrerent a moribus, videbantur ea melius in plebis temeritate, quàm in amplissimi ordinis consilio delitescere: plurimùm etiam valebat in vulgus opinio benignitatis, quâ erga populum Dux utebatur, qui nullius stultitiam, atque humilitatem fastidiebat, interdium, noctuque faciebat omnibus conveniendi sui potestatem. His rationibus manebat domi concordia, commodè administrabatur Respublica, cum subita seditio oborta est.

Postremi quidam projectâ audaciâ

ciâ homines faciem multitudinis ex facinorosis, atque egentibus congregatam in Senatum, & nobilitatem concitare seditiosis vocibus cœperunt: immortalam nobilium tyrannidem versari diutiùs in Republicâ non esse ferendum: illos primùm auctores belli, proditâ plebe, separatim sibi consuluisse; illos nunc de ejus cæde cum Austriacis consentire: &, cum fortè nunciaretur, venire Austriacos, conclamatumque propterea ad arma esset, unus ex iis præcipiti furore inflammatus: quid vos, inquit, Austriacos persequimini, cum domesticum in Urbe hostem habeatis? delete Senatum, qui, ut sibi, suisque nobilibus provideat, vestrum cum Austriacis exitium pactus est. Cur enim arma capere vetamur? cur publica occluduntur armamentaria? nempè id agitur, nisi præ-

cave-

cavemus, ut omnes, qui nobiles non sint, ex insidiis opprimantur. Sed præda ostenditur opima, præclara datur miseris occasio ulciscendi, & di-tandi se. Audeatis modò inane nobi-litatis nomen, vanissimaque magistra-tuum insignia contemnere, vestra sunt, o audaces & fortes viri, quæ-cumque illi per summam ignaviam pos-sident. Continuo prædarum spe, & impudenti inducta mendacio magna sordidissimæ plebis multitudo ad Præto-rium convolat, & per causam quæ-rendorum armorum irrumpere cona-tur. Cum ab armatis excubitoribus repelleretur, tormentum, quod fortè advehebatur, in foro novo ante fores Prætorii ingenti concursu, fremitu-que, & minis constituit. Tum Ja-cobus Laumellinus populari quâdam ratione plebi gratus in mediam irruens

tur-

turbam : occasu-ne Urbis vultis finire
Rempublicam ? vos-ne hujus patriæ
alumni , & verè Genuenses Ducis
excindetis , Senatusque sedem , quorum
virtute , & consilio vestra adhuc li-
bertas , vestra omnium stat salus ?
non herculè illi nobis infestissimi Au-
striaci audeant . Cum nihilò remissiùs
instarent , jamque ignem tormento ad-
jicerent , opposito Laumellinus corpo-
re , agite , inquit , explete iram , meâ
fatiamini cæde : minori flagitio interfi-
cietis civem , quàm totius Civitatis
præsidium evertitis ; & ego oportu-
nâ morte sublati tantum scelus non
videbo . Maximo viri animo obstu-
pescit multitudo . Paulatim incipit
emergere pœnitentia , redire obsequium ,
& fractus denique plebis furor eâ-
dem , quâ exarserat , celeritate , re-
xtinctus est . Seditionis duces paulò
post

post comprehensi, necatque furiosissimæ temeritatis pœnas dederunt: & Concilium Populi, reviviscente sensim Senatus auctoritate paulatim consensescere cœpit, & cum nihil fuit causæ quare haberetur, atque hostes, relictâ obsidione, discesserunt, tunc demum esse omninò desiit.

Dum hæc in Liguriâ geruntur, Brounius captis Lerinâ, Planasiâque insulis, Foroque occupato Vocontio, & præmissis, qui ad Argentium usque flumen progressi terrori essent hostibus, Antipolim ipse, perspecto urbis situ, & Britannis adjuvantibus, terrâ, marique oppugnare instituit. Sed defecerat Genua. Augebantur Gallis copiæ: lx. a Belgio cohortes advenerant, cumque iis Hispani iterum conjungi dicebantur. Nam Galliarum Rex, Ferdinando Regi ut satisfaceret,

ceret, Philippum Argensonium Camposiani auctorem colloquii a Concilio suo removerat, Malibojumque ab Italico exercitu revocaverat; quorum in locum domi Marchionem Puysiensem, summâ virum probitate, & prudentiâ præstantem, apud exercitum autem in Galliâ Narbonensi Ducem Bellinsulanum, eundemque Gallicæ militiæ Magistrum suffecerat. Rex verò Ferdinandus, si Austriacis in Italiâ Borbonii succubuiſſent, Carolo Fratri, Neapolique timebat; iique, quorum Ferdinandus consilio utebatur (ut timida est, longèque nimium prospiciens ambitio) vereri cœperant, si domum, amiſſâ Neapoli, Hispani Regni hæres, regnandique peritus Carolus rediret, ne fraterno amore, regiique nominis auctoritate apud Fratrem Ferdinandum ille plurimum, ipsi

minimùm valerent: atque ita commutato consilio, Italicum bellum suadebant, eratque adeò eorum suasionem Ferdinandi immutata voluntas, ut præcipitis eum receptus, consiliique poeniteret relinquendæ Italiæ. Itaque Borbonii, auctis, conjunctisque copiis, exercitus eduxerant suos. Quorum adventu perterritus Brounius, simul reputans, Genuensis spe commeatus amissâ, neque Antipolim oppugnari, neque diutius tolerari exercitum in locis minimè frumentariis posse, consilium commutat, oppugnatione desistit, exercitum contrahit, in Italiam redit. Regredientem illum usque ad Varum flumen Borbonii insequuntur; quin longius procederent, hyems prohibuit, & militum labor, quos tot præliis, atque itineribus defatigatos oportebat aliquandò in hiberna deduc-

deducere. Idem Sardinia^x Rex, idem Brounius facit, collocatoque in hibernis exercitu, Sardinia^x Rex Augustam Taurinorum revertitur, Brounius Mediolanum proficiscitur.

Botta deponere jussus imperium, Piccolomineo exercitum, atque is paulò post Sculemburgio tradiderat. Brouniani exercitus pars in Ligures deducebatur. Legionarii, ferentarii^{que} ex eo circiter cc. progressi villam Radianam, quæ non longè est a capite fluminis Urbis, occupaverant, aggerem^{que} ante illam præduxerant. Quare nunciata, Eques Hieronymus Balbus mittit eò confestim legionarios Genuenses lxxx. & voluntariorum militum manum, qui, cum ad hostes venissent, superata munitione, scalis admotis in ipsam per fenestras villam irruerunt. Illi Genuensium

oppressi audaciâ, nonnullis amissis, interclusâ fugâ, projectis armis dederunt sese.

Interim Rex Neapolis de Genuensi tumultu certior factus, & auctoritate permotus Marchionis Foliensis nobilissimi hominis, qui erat apud eum non tam dignitate, quàm fide, solertiâque, & amore in Regem singulari primus, actuariis suis, & quo maximè indigebant, frumento, commeatuque reliquo juvari Genuenses jubet. Genuensibus item, quo essent ad defendendam patriam paratiores, iis, qui in regno suo possessiones habebant, legeque eâ tenebantur, quæ est de absentibus, vectigal in annum remittit. Rex autem Galliæ Hispaniæ Regem per literas adhortabatur diligentissimas, ut Genuensibus quamprimum subveniret: pertinere id
ad

ad communem Borboniorum causam. Neque ipse pecuniâ, auxiliisque deerat, Bellinfulanoque mandaverat, ut de exercitu suo idoneam nactus tempestatem vi. hominum millia Genuam celerrimè submitteret.

Jamque octo minores ex eo numero duces advenerant, atque in his architecti militares duo, qui duodecies HS. attulerunt, &, quàm prompto, excellentique esset Rex in Rempublicam animo, Genuensibus exposuerunt, magnasque Gallorum copias subsidio statim venturas confirmarunt. Tanta erat Gallici subsidii expectatio, ut ad eos, cum exscendissent, vulgus conflueret maximâ occurrentium, prosequentiumque alacritate, perindè ac si libertas, & salus Civitatis advenisset. Sed ab eorum adventu quinque, & quadraginta ipsi erant dies, hyem-

que

que præcipitabat, & jam, majoribus coactis copiis, hostes erumpebant, neque e Galliâ naves, auxiliaque veniebant,angebanturque singularum horarum expectatione Genuenses, & quæ natura sollicitudinis est, quod sperabant, quod summè factum cupiebant, idipsum ne fieret, magnoperè metuebant. Miserat Senatus Augustinum Laumellinum Gallicâ functum legatione, qui Philippum Hispani Regis Fr., Borboniosque in Galliâ Narbonensi imperatores conveniret, eisque Civitatis spem, metum, periculum ostenderet: defatigatos Genuenses quotidianis propè præliis per quatuor ferè menses cum ferocissimo hoste solos configere, neque jam, licèt animus supersit, vires suppetere. Accelerarent, raperentque occasionem, quæ in armis plus interdum, quàm ratio posset.

Tan-

Tandem Massiliâ , Teloneque commeatus , navesque solverant . Sed is fuit persequentium Britannorum impetus , ut aliæ , undè erant profectæ , referrentur , aliæ idonea ad egrediendum loca in Ligustico litore , ad orientem solem quod vergit , Corsicæque portus peterent , nonnullæ etiam ab hostibus caperentur . Quæ verò navis Marchionem Mauriacensem auxiliarium copiarum ducem , militesque una aliquot sustulerat , in altum provecta , & prospero usâ vento Genuam xiv. kal. April. accessit , tardiùsque confecto cursu , & quæ deerraverant , & quæ Hispanorum militum partem advehebant , Britannicæque classis metu in Lunensem sese portum introduxerant , eòdem postea delatæ sunt .

Sculemburgius , hyeme confectâ , cum ipso anni tempore ad bellum ger-

ren-

32 DE BELLO ITALICO,
rendum vocaretur, magnâ difficultate afficiebatur, quâ ratione id administrare posset. Nam si hostem assiduis præliis conficere vellet, non satis erat copiarum; si ad oppugnandam Genuam contenderet, tormenta deerant. Quod fuerat in exercitu roboris, Galliae occupandæ Narbonensis consilium, itus, reditusque copiarum absumpserat, & cum illata, uti suprà demonstravimus, de Placentinâ prædâ controversia minui non potuisset, jacebant eâ in Urbe multa, & præclara tormenta, quæ Borboniorum fuerant, quæque magno ad bellum Genuense usui esse poterant. Cui quidem bello ipse Rex Sardiniae non satis inservire diligenter videbatur vel illius prædæ cupiditate abstractus, vel co permotus, quòd neque Austriacorum, si Genuam cæpissent, nimis val-

valdè augeri in Italiâ potentiam, neque suum, si auxilia subministrasset, immi-
nui exercitum volebat. Itaque postu-
latis, responsis, colloquiisque rem du-
cebat, eâque de causâ Augustam Tau-
rinorum missus ab Sculemburgio Blon-
chedius fuerat Trib. mil. qui, omisâ
Placentinæ prædæ controversiâ, cum
Rege Sardiniae de tormentis, auxiliis-
que, aliquâ interpositâ ratione, deli-
beraret. Ut autem Regis Sardiniae
animus expugnari posset, tamen erant
propter itinerum angustias durissimæ
commeatum, tormentorumque sub-
vectiones. His tamen difficultatibus
non deterriti Austriaci, atque odio
ducti Genuensium, a quibus se in
Italico primùm, deindè in Gallico
bello impeditos videbant, tot contu-
meliis acceptis, gloriâ rei militaris di-
minutâ, recentes, veteresque injurias

armis persequi properabant, & nondum satis parati ad ipsam Urbem Genuam oppugnandam accedere constituerant.

Ad mare Ligusticum, ipsumque Apennini initium sita est vetustissima Urbs Genua, saxis, scopulisque sublata, quos maris secuti opportunitatem industrii primùm homines incoluerunt, affluenteque mox civium, & divitiarum copiâ, sumptuosis, magnificisque ædificiis exornarunt. Instructis mari propugnaculis, mœnibusque, veteri, novoque, ut diximus, terrâ muro cingitur. Portum habet ante se in ædificatione, aspectuque Urbis inclusum, projectis in mare molibus, quæ portus ostium efficiunt, emporiique celebritate nobilem, & quantævis classi satis amplum, ab Africoque, cui primùm vento maximè erat obnoxius,

obje-

objectâ nunc immensi operis mole,
 satis protectum. Quæ pars Urbis in
 occidentem solem spectat ad Pharum,
 mirificæ substructionis turrim in pro-
 montorio positam, pertinet; quæ ve-
 rò in orientem vergit, tumulo termi-
 natur, qui Carinianus dicitur. Ab
 utrâque parte novus per inæquales,
 præruptosque colles ducitur murus cir-
 citer millia passuum ix. in circuitu pa-
 tens, atque in angulum ad eum lo-
 cum coangustatur, cui nomen Spero
 est: opus certè arte, naturâque, quâ
 maximè ad occidentem spectat, mu-
 nitissimum. Duæ duabus ex partibus
 frequentissimæ valles; duo item sunt
 flumina, quorum alterum, uti primo
 libro demonstravimus, Porciferæ valli
 nomen indidit, ad Arenariumque sub-
 urbanum in mare influit, alterum Bis-
 amnatem interfluit vallem, Ferritor-

que appellatur. E regione Cariniani suburbanum est Albarense paulò editiore loco, atque omnium amœnissimo. Huic suburbano, eique Urbis munitioni, quæ Zerbinus nominatur, interjecto Feritoris fluminis alveo, fanum imminet Mariæ Montanæ, cœnobiumque Minoritarum; neque ita longè continuatio quædam montium assurgit, quæ paulatim ad mare delabens quarto ab Urbe Genuâ lapide orientem versùs in vallem desinit, quam Sturlam vocant. Duo sunt a Septemtrione pari ferè altitudine, formæque montes, Geminique ideò Fratres appellantur, qui ab angulo novi muri, Speroneque passus fermè dcccc. absunt, muniti, & circumcisi admodum, maximæque ad repugnandum, oppugnandumque opportunitatis; iisque mediocri diremptus intervallo mons est

est oppositus, qui nomen ab adamante accepit, ad ejusque radices situs est Turracia vicus, medio ferè inter utramque vallem spatio. Loca omnia circa Genuam aspera, rupes præaltæ, itinera ardua, duri homines, nulla pabuli, nulla frumenti copia, adeo ut propter inopiam regionis neque morari diutiùs exercitus, neque progredi propter iniquitatem facilè possint. Ipsa Urbs magnitudine operum, firmitate muri, multitudine civium, atque omni bellico apparatu instructa longam, & difficilem habet oppugnationem.

Reversus Blonchedius impetrata ab Rege Sardinia auxilia, cumque eo, agente Britannorum Legato, in has fermè leges transactum esse nunciat: relictâ Genuâ, Austriaci, Rexque Sardinia partirentur inter se Reipublicæ
impe-

imperium, & quâ ad orientem, occidentemque spectat, æqualiter quisque, atque opportunè haberent. Lunensis autem portus Francisco Lotharingio Cæsari, eidemque magno Etruriæ Duci attribueretur, cùm debellatum esset: atque ita Austriaci ne præmiorum belli Genuensis partem Regi denegarent, Rex ut, rejectâ in aliud tempus Placentinæ prædæ controversiâ, xii. cohortes, deductaque arce Savonensi tormenta subsidio Austriacis mitteret; idque subsidium celeriter venturum idem Blonchedius confirmat. Quibus rebus cognitis, Sculemburgius, & re frumentariâ præparatâ, pluraque in agmina distributis copiis, quæ esse ad duodeviginti hominum millia dicebantur, Novis noctu proficiscitur.

Occupatis, uti supra cognitum est,

est, Ligusticis a Bottâ faucibus, Austriaci, exquisito per exploratores itinere, ex omnibus montium jugis subito sese ejiciunt universi, & Porciferam simul vallem, simul Bisamnatem conari obtinere videntur: eodemque tempore Præfectus Britannicæ classis Genuensis portus aditum obseperat, nullaque a custodiis navium Ligustici litoris loca vacare patiebatur. Præscriptum item erat Vogternio, uti, coactis ex Cisalpinâ Galliâ ii. hominum millibus, in Sergianensem provinciam erumperet, eo consilio, ut, omnibus obsessis viis, intercluso terrâ, marique commeatu, aut fame subacti deditio- nem Genuenses facerent, aut ferro ignique confecti pervicacis furoris pœnam subirent.

At Genuenses naturâ loci, auxiliisque Borboniorum, & veniæ desperatio-

ratione confisi paratissimo erant ad resistendum animo. Sed cum neque ardua, neque munita loca vim hostium undique erumpentium sustinere possent, cumque rei militaris imperiti Ligures exercitatissimis hostibus opponerentur, pedem referre Genuenses coguntur, amissoque Montogio, ad Mariæ Montanæ fanum sese recipiunt: & Porciferani, quanquam acrius Piccolomineo repugnauerant, casam quandam propè Langentium pagum nonnullis levis armaturæ peditibus fortissimè defendentibus; tamen ipsi quoque hostium virtute submoti ab Bolzanetum sese recipere coacti sunt, quo in vico præsidium erat Gallorum. Sculemburgius, qui in itinere ex equo ceciderat, latusque vehementer offenderat, captis quaquaversùs locis pluribus opportunis, occupato a fronte,

com-

communiquoque monte Adamante, & collocato post se Sanctandræensi castrorum Præfecto, ne intercluderetur, ipse apud Turraciam, idoneo, ut diximus, ad utranque vallem loco, prætorium constituit.

At Mauriacensis Gallorum Præfectus, ubi hostes tam propè ab Urbe constituisse accepit, vel inopiâ consilii perturbatus, vel non satis cognitâ locorum naturâ, simul suis, qui paucissimi erant, atque Urbi præmetuens deduci Bolzaneto præsidium, Geminosque Fratres relinqui, omnesque sub mœnibus copias constitui jubet. Quo facto, qui ad Mariæ Montanæ excubabant, ii etiam sese ad Urbem receperunt. Porciferani autem, etsi a Gallis deserti, tamen in tuendi Bolzaneti consilio constantissimè permanserunt, quòd verebantur, si

42 DE BELLO ITALICO ,
cum Austriaci locum tenuissent , ne
liberiùs , vastandi , prædandique causâ
sefe in vallem effunderent .

Relicto monte Geminorum Fra-
trum , cedentibus Gallis , cum tota
fremeret Civitas , commotus omnium
querelis , & Guimontii potissimum ,
qui erat apud Rempublicam Gallo-
rum Regis Legatus , monitis incitatus
Mauriacensis petit eâdem nocte ab
Senatu , ut urbanæ militiæ partem
Roccæpinio Trib. mil. attribuat , cui
mandaverat ipse , ut relictum sinè ul-
lâ cunctatione montem reciperet . Cum
Galli inconsiderantiam receptus celeri-
tate irruptionis corrigere cuperent , Ge-
nuenses , quorum maximè res ageba-
tur , arreptis armis , concurrerent , fa-
cile , aliquot dejectis Austriacis , qui
ex vicino Adamante successerant , Ge-
minorum Fratrum mons receptus est ,
eoque

eoque recepto rursùs, qui a Mariæ Montanæ fano profugerant, eòdem celeriter redierunt. Montem Senatus firmo præsidio tenendum, additisque operibus muniendum, eique muniti-
oni, qui invicem cum Gallis præes-
sent, quòque res vocaret, Senatus nomine accurrerent, Joannem-Carolum Pallavicinum, Felicem Balbum, Nicolaum Jovium, Francum Grimaldum designandos censuit, & Jacobum item Grimaldum, atque Ambrosium Centurionem, quorum alter Venetiis, alter e Galliâ, audito patriæ discrimine, Genuam confestim advolarat: iisque deinde, quoniam pro multitudine rerum gerendarum pauci videbantur, Carolus, & Pasqualis Spinulæ, & Franciscus Franconius ex S. C. adjuncti sunt: cumque ad Scoffaram, qui locus ad Bisamnatem vallem

tuendam, refrænandosque ab eâ parte hostium impetus peropportunos erat, magna Ligurum multitudo convenisset, iis qui præesset, missus est Petrus Canevarius, de quo ante dictum est.

At Vogternius in Sergianensem provinciam progressus, conventum opidi, atque arcis Præfectum, cum neque pollicitationibus, neque denunciatione periculi permovere posset, equites, peditesque suos infesto agmine procedere iussit. Eò Senatus jussu venerat Michael Pincetius. Hic magnâ tumultuariorum militum manu contractâ, Sergianenses confirmat, præsidia in locis, quæ erant hostibus finitima, constituit, ipse cum reliquis copiis ad hostes proficiscitur, acriterque in eos impetu facto, repulit, atque aliquot millia passuum profecutus consistendi illis facultatem non dedit. Quo per-

motus

motus incommodo Vogternius, cum omnem adversus se consentire provinciam intelligeret, atque intrare intra præsidia periculosum putaret, infectâre, discessit, & Massensem, Lucensemque agrum maximis emensus itineribus, Apenninumque transgressus sese ad Sculemburgium propè Genuam recepit.

Sculemburgius, cum denunciatio- nes, admoto exercitu, majorem habere vim, &, dum in metu est, parvo populum momento quam ad cumque conditionem impelli posse existimaret, denunciari Genuensibus per Blonchedium jussit, uti arma ponerent, imperata facerent: Reginam, tamen si gravissimâ digni pœnâ Genuenses sint, qui rebellionem post deditio- nem fecerint, veteresque injurias novo scelere cumularint, tamen eos pro suâ
mise-

miseriçordiâ conservatos , quàm deletos malle ; siquidem , priusquàm , quæ in itinere sunt , tormenta ad exercitum advehantur , ad sanitatem redeant : nullam , adveçtis tormentis , futuram deditionis conditionem , atque intellectu-ros Genuenses , quàm miseris grave , & temerarium sit , irritare potentiores , in demissâque fortunâ spiritus gerere magnos magis , quàm utiles : denique constituent ipsi , utrum , pace firmatâ , omnique dempto metu , regiæ clementiæ malint , an , vastatis agris , interfectis civibus , eversâ patriâ , severitatis periculum facere . Hâc ad Senatum relatâ denunciatione , ita Jacobus Grimaldus ex auctoritate Blonchedio respondit : Jus esse naturæ , ut sua quisque quâcumque ratione defendat ; neque ullo obstringi scelere , si quis alienam ab se injuriam propul-

pulsaverit : illos videri potius ab æquitate , justitiâque discedere , qui tantum sibi licere putant , quantum possunt , & , cum in aliena tam impudenter invadant , innocentes accusent , qui sua tueantur : Reginam , quæ adeo clementiæ nomine gloriatur , non potuisse non commoveri , si inaudiverit , quàm iniqua , quàm multa ab Ducibus suis pertulerint Genuenses , qui quidem ipso in belli ardore suæ maluerunt utilitatis , quàm eximiæ erga illam observantiæ oblivisci : irritatam toties patientiam postremò in furorem erupisse , & , qui ab omni cum Reginâ bello semper abhorruerint , eò esse demum adactos , ut arma fumerent , quæ justissima sint oportet , cum necessaria fuerint : armis sumptis , sic esse Genuenses paratos , ut nec obsideri , si necessitas coegerit , nec mori ,
si ca-

si casus inciderit, pro libertate recusent: cætera superis, fortunæque committant. Sculemburgius, ubi intellexit, neque Genuensium frangi constantiam jactatis denunciationibus, neque concordiam, quam optima domi disciplina, externique metus hostis faciebat, convelli posse, nullamque propterea aut spem, aut causam deditiois esse, ad reliquam cogitationem belli sese recepit. Itaque & munire vias instituit, quo faciliùs tormenta subveherentur, & alia ex aliis loca occupare perseveravit, ut Genuenses quàm angustissimè contineret.

Advenerat interim Genuam Dux Bouflertius, Gallici exercitus Legatus, atque unus e principibus Gallicæ nobilitatis, Equitemque Chovelenium castrorum Præfectum, nonnullosque alios duces adduxerat, &, quòd non
fine

finè causâ tantus Vir a Galliæ Rege submissus videbatur , civitatis spem , alacritatemque renovaverat . Ille in magno populi concursu , plausuque Senatum ingressus ita Ducem , Senatoresque est allocutus : Eâdem Genuenses animi magnitudine Reipublicæ libertatem , & Galliæ salutem attulisse , quosque hostes a cervicibus suis repulerint , eosdem a Galliæ finibus retraxisse : itaque sibi prius beneficio fuisse , & virtutis famâ , quàm vultu , congressuque cognitos ; seseque , cum ad eos veniret , existimavisse ad Marcellos , Scipiones , Fabios venire , quorum animi robur nullis fractum calamitatibus , & vix posteris credibile manu ipsi , usuque revocaverint : hujus famâ virtutis commotum statuisse Galliæ Regem non tam bello , quàm fide præstantem benemeritæ Reipublicæ

omnibus modis subvenire, seseque ab
eò missum, qui præsens regiæ testis
esset, atque obses voluntatis: proinde
hortari, cujus hostis insolentiam soli
ejecerint, soli hætenùs retuderint, ut
ejus in oppugnatione audaciam maxi-
mi Regis auxilio freti contemnere ne
vereantur: Regis illos Legatum habi-
turos ad belli consilia socium, ad pe-
ricula ducem, neque se Gallum esse
melius omnibus probare posse, quàm
si amore, fideque erga Rempublicam
Genuensis fuerit. Dux Galliæ Regis
benignitatem summis laudibus extulit,
qui Rempublicam in gravissimis peri-
culis & adjuverit jam egregiâ liberali-
tate, & nunc Legatum ad eam am-
plissimum Virum mittat: tanti benefi-
cii nunquam se, nunquam Senatum,
totamque Civitatem immemorem fu-
turam: potuisse Genuensibus hostes
oppi-

oppida, agros, pecuniam adimere, fidem, atque animum neque ademisse, neque adimere potuisse: itaque futuros eosdem, qui semper fuerint, ut in bello fortes, ita in fœdere constantes, atque hoc etiam magis, quo minùs nunc sunt de exitu rerum, adjuvante potentissimo Rege, solliciti. His actis in Senatu, magnâ omnium alacritate discessum est.

Paulò longiùs progressi Sextum, Vulturemque ad mare oppida occupaverant Austriaci, & Pinum in montibus, cc. edito loco impositis militibus, additisque munitionibus tenebant. Vulturenses Austriacorum perterriti adventu, auctore, & sequestre timidissimo quodam loci sacerdote, sese Franchinio Trib. mil. dediderunt. Deditione factâ, proximis improvisò ex montibus cum suâ tumultuariorum

militum centuriâ descendens intervenit Ænobarbus , conditiones nihil moratur , impetum facit , occidit nonnullos , fugat omnes , longissimèque fugientes insequitur . Hujus operâ Ænobarbi eo Genuenses bello , optimâ , fortissimâque sunt usi , & ipse , rebus strenuè gestis , cum humili ortus loco ignotissimus antea fuisset , pervenit ad hominum famam .

Altera ex parte Stephanus Laumellinus amantissimus Patriæ Vir , qui , Venetiis initio belli relictis , ad opem statim Reipublicæ ferendam convolarat , cum Mariæ Montanæ fano præesset Pyrochitrophorique cIo. Austriaci loco potiri conarentur , qui Lupâ-Amara dicitur , eò profectus est ; eodemque tempore Paulus Gentilis cum militibus legionariis , Liguribusque aliquot Stajene progressus ad Pinum pervenit . Ne his
qui-

quidem locis impetum Genuensium Austriaci tulerunt, compluribusque amissis, relictis impedimentis, atque ipsis quas instituerant, munitionibus, ad suos sese præcipiti fugâ receperunt.

Eodem ferè tempore a Creto, ubi Sanctandræensis constit erat, duplici hostes agmine proficiscuntur, Canevariumque, qui Scoffaræ, ut diximus, præerat, dextrâ sinistrâque adoriri parant. Qui Lavaniolam, qui item Montem Cornarium obtinebant, quæ prima erant opposita hostibus venientibus loca, pedem Ligures referre cœperunt, eatenûsque retulere, quoad locum nacti opportunum subsistere, & militum, qui adveniebant, subsidio confisi repugnare potuerunt. Nam eâ re nunciatâ Canevarius iisdem, quibus Austriaci venerant, jugis mille statim Bisamnates, iisque qui subsidio essent,

54 DE BELLO ITALICO ,
essent , legionarios nonnullos bipartito
mittit ; & partem , in quâ ipse erat ,
aggredi a latere hostem , partem a ter-
go invadere jubet . Commisso prælio ,
Genuenses Adolescentuli ducis alacritate
incitati acrius impugnant ; illi Genuen-
sium audacia , & , ne intercluderen-
tur , metu commoti celeriter loco ce-
dunt . Itaque interficiuntur , fugantur .
At Canevarius , dum , fuis hostibus ,
retinere suos a prædâ , atque ad ar-
cem occupandam Turriliam , quam
hostium fugâ desertam esse cognoverat ,
adducere obequitans , adhortansque
contendit , longiùs progressus , jaculi-
que in adversum os ictu vulneratus
ex equo delabitur : conantibus auxilia-
ri suis ; frustrâ , inquit , attollere co-
namini , quem jam vita deficit : unum
oro , celentur meâ de morte milites ,
ne ipsius nuncio debilitatis eorum ani-
mis,

mis, parta jam victoria interpelletur. Ego satis vixi, siquidem invictus, & pro patriâ morior. Redintegratur Canevarii morte hostium cædes, crevitque adeò Ligurum furor, ut irâ flagrantibus non captivis, non vulneratis parcerent. Refertur in Urbem Canevarii cadaver, ad cuius aspectum tristissimus augetur omnium dolor, quem jam mortis nuncius fecerat. Concurrebant, videre cupiebant; illum mortuum consuevisse ajebant, dum viveret, hostibus terrorem, suis animum addere: illum ad parandos milites liberalem, ad pericula, consiliaque belli fortem, & prudentem fuisse, atque hæc egisse omnia, cum ad annos xxii. natus esset. Nam Canevarius non solum animo, sed etiam, quod non erat ab eâ ætate postulandum, consilio erat non vulgari. Fue-

rat

56 DE BELLO ITALICO,
rat in Galliâ Cisalpinâ apud exercitum
Reipublicæ Protrib. mil. legionis Li-
gusticæ; prælio ad Tanarum inter-
fuerat, paucisque mensibus, cum es-
set Genuâ profectus rei militaris ru-
dis, factus redierat dux: adeo verum
est, ab excellentibus ingeniis indoci-
lem usus disciplinam non desiderari.
Supremo die suo quàm amplissimè ela-
tus est, funebrique pompæ tota fer-
mè Civitas, milites, ducesque, ipse
inprimis Dux Bouflertius interfuit. Fa-
ctum est etiam S. C., ut Petro Ca-
nevatio invictissimo Adolescenti ob
mortem pro Republicâ obitam statua
marmorea in curiâ poneretur, quæ
tantæ virtutis monumentum, patriæ-
que posteris defendendæ exemplum
esset.

His omnibus præliis intellectum
est, neque Austriacis satis esse animi,
quòd

quòd locorum naturam ignorarent, neque Liguribus constantiæ, si a nobilium exemplo, & legionariorum subsidio defererentur. Accedebat hùc ut militari assuefacti disciplinâ Austriaci meliùs progredierentur, &, quæ cæpissent loca, peritiùs defenderent. Ligures autem facile a signis discederent, magisque in singulis interficiendis militibus, quàm in summâ rerum Austriacis nocerent. Erat tamen in hoc bellandi genere illud Genuensibus opportunum, quod & levibus præliis atterebatur hostis, quem deteriorem in dies locus alienus, & tempus faciebat, & Liguribus quotidianâ præliandi consuetudine animus accedebat: fociis prætereà spatium erat mittendi auxilia, quæ per medias Britannorum classes parvis advecta navigiis in Genuæ portum facilè irrepebant.

Austriaci, Coronatæ occupato fano, quod edito loco positum, propius jam, instructis munitionibus, Arenario suburbano succedebant. Genuenses, quò longius illos arcerent, a Porciferæ annis ostio ad eam exteriorem Urbis munitionem, quàm Forcipem appellant, comprehenso colle, qui ab amœno prospectu nomen accepit, aggerem perducere, atque instruere properabant, neque adactis ex hostium munitione, Britannicâque navi, quæ rei impediendæ causâ ad litus accesserat, telis deterrebantur, quominus opus urgerent. Quin etiam ipsi suorum tormentorum vi Austriacos, Britannosque vexabant, Franchiniumque interfecerant nefariam uli crudelitatem, quâ ille in miseros Porciferanos omnia exempla cruciatus ediderat: eâdemque celeritate ab alterâ Urbis

bis parte Albarense suburbanum, excelsioraque circum loca munire curabant, & sic sunt patriæ tutandæ studio incitati homines insueti militaris patientiæ, ut rem multi operis, ac laboris, adhibitis militaribus architectis, nobilissimisque ad opus viris excubantibus, brevè perficerent.

Adventus Ducis Bouffertii summâ spe, & voluntate Civitatem compleverat; nec minùs ipse, quàm in Senatu confirmaverat, animo laborabat, ut Reipublicæ Genuensis amantissimus videretur. Nam, seu quid communicandum, seu quid administrandum esset ipse principes Civitatis benignè appellabat, ipse plebem effusâ largitione incitabat, interdium, nocturneque obequitans, interim pedes, nihil apud hostes tutum, nihil apud suos languidum patiebatur. Namque

etiam per eos dies Coronatæ fano depellere Austriacos constituerat, urbanamque esse in armis militiam, seseque ad nocturnam parare eruptionem jusserat. Signo dato, omnes convenerant. Ipse monendo, cohortandoque aderat Bouflertius. Movebantur etiam exemplo Josephi Duratii, qui provecâ ætate, ut sæpè aliàs, ita tunc armatus prodierat, nummosque populo spargens rem adjuvabat. Sed infregit consilium fœdissima coorta tempestas, adeout, proluentibus undique aquis violentissimis, neque arma homines tenere, neque pedem progredi possent.

Senatus, cum multa, quæ pertinerent ad sollicitandum statum Reipublicæ, excitari in turbâ belli posse existimaret, saluberrimumque censeret in maximis rebus summam

im-

imperii apud unum esse, quæstionibus extrâ ordinem exercendis quasi dictatorem dixit Augustinum Gavorum, qui pœnâ paucos, terrore omnes afficiens intestino scelere Rempubli-
cam liberavit. Magnam interim argenti vim in bellum Genuensibus Rex Galliæ dare, neque minorem Hispaniæ Rex liberalissimè polliceri perseverabat, & auxilia uterque submittebat.

Auctâ classe, omnibus longè, latèque litoribus occupatis, intentiores erant ad custodias Britanni. Genuenses ad recipienda auxilia, quæ, classis metu, portu Monæci continebantur, lx. phaselos miserant, iisque præsidio naves longas duas. Nam commeatus propter ejusmodi agilitatem navigiorum facilius elabebantur, minusque, si nonnulla fortè ex iis in cursu offenderent, deperibat militum, qui se-
para-

paratim in plures erant phaselos impositi. Ac primò in noctem conjecti phaseli, obductâque summo mane nebulâ occultati Britannicam fefellerant classem : deinde ubi diluxit, discussaque caligo est, apparuere. Quos cum audaciùs progressos Britanni vidissent, sperantes intercipi posse, prædatoriam subito navim, myoparonem, atque aphractum ad eos miserunt. Genuenses, eductis triremibus duabus, conantes portum capere phaselos protegabant, prædatoriamque navim jactis morabantur telis. Eodem tempore naves longæ duæ Genuenses myoparonem, aphractumque Britannorum, commisso prælio, distinebant. Quæ res magnum attulit phaselis ad incolumitatem momentum. Nacti enim spatium, cum vehementiùs remos incitassent, in portum omnes refugerunt, quos

quos statim, repulsis, elusisque Britannis, naves longæ, ac triremes consecutæ sunt. Ea expectati auxilii spes, is ex prælio metus animos versabat Civitatis, ut nemo ferè Genuæ fuerit, quin visendi causâ altissima tecta, mœniaque petens ex omni prospectu locum spectaculo cæperit, lætusque, confecto prælio, & gratulabundus ad portum procurrerit. At Britanni omnium dominatores marium, tantâ sub oculis acceptâ ignominiâ, magnoperè fremebant, eoque id magis, quod crebris sollicitabantur Austriacorum querelis, qui auxiliorum adventum eorum negligentia falsò tribuebant. Nam Genuenses nautici, & ipsi homines domestico maris usu valebant, parvulisque navigiis, quibus incredibili celeritate transmittentes, ad litora sese statim, vadaque applicabant, atque

que ita Britannicarum impetum navium ferè semper fugiebant. Magna prætereâ est maritimarum rerum inconstantia, & difficultas, utpotè quas interdum malacia detinet, tempestas sæpe affligit, incertissimæque semper res, ventus atque unda gubernant. Neque verò, dimissis quaquaversùs aphractis, parùm proficiebant Britanni, submissâque etiam navi, quæ contrà Nervium in anchoris consisteret, eamque esse partem, quæ propter angustissimam oram Genuam ducit conjectis infestam telis haberet, importari terrâ in Urbem commeatus prohibebant, exsensionemque eo loco facere tentarant. Sed periculum veriti, quòd Ligures arma cæperant, ad navem statim refugerant, quam paulopost, sublatis anchoris, in altum remulco adducere coacti sunt. Illam enim Ligures,

gures, duobus allatis noctu tormentis, repentino impetu telorum labefactaverant.

Venerant tandem xii. Subalpino-
rum cohortes, quarum Comiti Roccæ-
sio permissum erat imperium, atque
is, capto, direptoque Vulture, ad Se-
xtum castra fecerat, eoque tormenta
Savonensi arce deducta, reliquaque,
quæ ad oppugnationem pertinent, ter-
restri desperato itinere, Britannicis na-
vibus supportabantur. Aucto Sculem-
burgius exercitu, collem quendam,
in quo fanum est Misericordiæ posi-
tum, Ligurum dejecto præsidio, fa-
cilè potitur; qui collis abest ab Ge-
nuâ millia passuum ii.. Genuenses eo
amisso loco, tametsi non maximi erat
momenti, tamen vehementer propter
nimiam cujuscumque rei sollicitudi-
nem perturbantur. Bouflertius, ne per

otium hostium increſceret audacia, & vulgi ingraveſceret timor, ſignum dari, recipique collem, fanumque imperat, idque confestim conatus effecturum ſe ſperabat, propterea quòd amnis Porcifera, qui medius inter eos, qui fanum obtinebant, reliquaque hostium præſidia fluebat, coortis imbribus, eâ nocte admodum creverat, ut, quominus alii aliis ſubſidio irent hostes, impedire poſſe videretur. Dat negotium Chovelenio caſtrorum Præfecto, uti princeps prælium ineat. Ille urbanæ militiæ centuriis, & Gallis, atque Hiſpanis aliquot aſſumptis, ad hostes proficiſcitur, in eoſque, cum hora diei eſſet octava, impetum facit, acerrimèque repugnantes, relictis inferioribus locis, ad fanum ſeſe recipere cogit. Eodem tempore Comes Lannionenſis, qui Geminorum-Fra-

trum monti præsidio erat, eruptione factâ, hostes a latere premebat, jamque, cum ab horâ octavâ ad vespærum pugnatum esset, Hispani, Gallicque Pyrochitrophori captis Austriacis compluribus, atque occisis, fano appropinquabant, in eoque jam erant, ut irrumperent: cùm Bouffertius, qui ad portam Granarolam progressus eventum pugnæ expectabat, receptui cani jussit. Nam, & satis ad hostium minuendam audaciam, Genuensiumque confirmandos animos factum existimabat, & Lannionensis eruptione, Geminorum-Fratrum montem nudari volebat, ne vacuum a præsidio eum hostis occuparet. Prætereà, cum res studio esset contentionis propè in noctem deducta, in tantâ veteranorum paucitate nocturnum esse prælium vitandum censebat. Ita in occupato Au-

striaci colle remanserunt, Borbonii, & Genuenses in Urbem reversi sunt; cum hi, quòd primo concursu terga vertere hostes coegissent, vicisse sibi viderentur, illi vicissent. Tumulum enim, fanumque, quæ causa pugnandi fuerat, tenuerunt. Pauci ex Borboniis, & Genuensibus cecidere, in his Marchio Fajensis Trib. mil. de exercitu Gallico, qui hostibus insistens mortiferum vulnus accepit, ex eoque postridie interiit. Ipse fortissimè pugnans vulneratur Chovelenius. Francus autem Grimaldus in medios ardore pugnandi abreptus hostes, ab iis captus est, unum præstantissimus Adolefcens, dum caperetur, questus, quòd, cum in alienam veniret potestatem, Patriæ suæ inservire non posset. Operum magnitudo, & continens tot mensium labor populi studium

dium infirmare videbatur, erantque, qui propter non magnum in re militari usum non magnum sæpe periculum miserarentur, firmioresque existimarent hostes, quàm reverà essent. Multa improbi fingeant, prudentes suspicabantur, timidi credebant, ut his omnibus rebus magnus paulatim irrepere timor, & desperatio posse videretur. Itaque, ne in medio rerum cursu impetus resideret animorum; artificum capita, urbanæque plebis principes in curiam extrà ordinem cogere, eosque alloqui de Senatus sententiâ Brignolius Dux constituit. Cum frequentes convenissent, magnaue prætereà affluxisset multitudo amictus togâ purpureâ Dux, & sedens in solio: Non negaverim, inquit, Genuenses me ultrò ad vos tanquam ad homines diuturnitate belli defatigatos,
hor-

hortandi causâ processisse; sed tanti ego facio frequentiam hanc vestram, quâ in hunc locum rogati convenistis, eam in vultu omnium, atque oculis eminere video patriæ alacritatem defendendæ, ut gratulatione mihi potius, quàm hortatione utendum esse intelligam. Quid enim eos horter, quos intueor, paratissimos? est verò, quod patriæ, quæ cives genuit fortissimos, est quod vobis, qui patriam servastis pulcherrimam, est denique mihi ipsi quod gratuler, cujus imperii nomen multo illustrius perveniet ad posteros vestræ commendatione virtutis. Quanquam haud scio, an hæc ipsa gratulatio supervacanea sit, cujus est usus confecto bello reservandus, ne fortunæ beneficium præripuisse videamur. Quæ erunt igitur meæ partes? illud unum vos admonere, ut
vestri

vestri similes sitis, idque efficiatis, ut extrema principiis consentiant. Nam quid minus conveniret, Genuenses, quàm, collocatæ cum essent in cervicibus nostris victrices Austriacorum legiones, vos privato consilio (nec enim aliter fieri potuit) ejeētis illis, sustinuisse solos labantem fortunam Reipublicæ, & nunc auctore Senatu, consentientibus omnibus, adjuvantibus Regibus potentissimis, animo deficere? an hostem ut videamini timere, quem fugastis? aut aliquid ab eo æqui sperare, qui stare sibi non posse videtur, nisi hâc eversâ, & deletâ civitate? qui non pecuniam, ut antea, sed jam iratus sanguinem vestrum concupiscit? nullâ magnoperè lacesitus injuriâ ad pacatos, ad deditos accedens nihil sceleris, nihil crudelitatis prætermisit: quid hîc faciet dolore ardens amissæ prædæ, & gran-

72 DE BELLO ITALICO,
& grandi læsus ignominiâ, quâcum-
que ratione in Urbem hanc redire
potuerit? sed, ut spero, & video,
non poterit. Eos habemus socios
Reges, quos eadem nobiscum arctis-
simè causa conjungit, eos Regum Le-
gatos, eam Senatus constantiam, eum
omnium ordinum consensum, ut ve-
hementer sit hostibus de victoriâ de-
sperandum? qui neque pauci tantæ
Urbis oppugnandæ molem sustinere
queunt, & quò plures sunt, pluri-
bus rebus in nudo, atque aspero so-
lo egere necesse est. Non Britanni,
unâ, aut alterâ intercæptâ naviculâ,
commeatus, auxiliaque nostra impe-
dire; non Subalpini, paucis commis-
sis cohortibus, ad summam belli mul-
tùm proficere possunt. Atque hos
ipsos jam ad respicienda cuique dome-
stica mala belli per vos excitata for-
tuna,

tuna , & Borboniorum in Belgio , Italiâque victoriæ convertent . Quid autem sinè his Austriaci poterunt omnium egentes rerum , & quotidianis deminuti præliis ? Tolerate , Genuenses , paucorum dierum molestiam , & tantum hunc oppugnationis apparatus ad nihilum propè diem recidere videbitis . Nolite interim aut stultâ aliquâ spe aperire ad occasionem locum hosti , aut vano metu , animique imbecillitate patriam omnem prosternere , eorumque etiam auxilio , vobis trepidantibus , spoliare , qui vestræ salutis causâ maris , atque hostium periculum neglexerunt . Quæ Hispani , quæ Galli milites pro vobis gesserint , atque gerant , ipsi videtis . Quo socii Reges , quo inprimis Galliæ Rex sit animo in Rempublicam , quâ fide , adest , qui vo-

74 DE BELLO ITALICO ,
bis ostendat nobilissimus Legatus ip-
sius Bouffertius , regiae testis volun-
tatis , & vestrae idem aestimator vir-
tutis . An patriam peregrini vestram
studiosius defendent , quàm cives ?
an poenitet vos , quod , Republicâ re-
cuperatâ , famam estis apud omnes
gentes , atque immortalem gloriam
consecuti ?

Quod si , his omissis , causam
belli spectare , eamque judicare melio-
rem velimus , quam etiam Coelestes
adjuverint : quænam esse potest , Ge-
nuenses , causâ justior bellandi , quàm
quæ adversus teterrimos patriæ op-
pugnatores civium armat manus ? aut
quisnam illud sinè Divino evenisse
consilio existimet , quo factum est ,
ut exercitatissimi , paratissimique ho-
stes vincerentur a vobis , qui propè
eratis inermes , & nullum certè rei
mili-

militaris usum habebatis? Superis igitur, hominibusque juvantibus, incumbite, Genuenses, in optimam causam, eamque nunc meliore belli conditione retinete virtutem, quàm a principio perditâ ferè fortunâ præstitistis. Qualis erit vestra in bello virtus, talis erit hujus Urbis, & totius nominis Genuensis sors. En ego vester Dux pro patriâ, pro vobis, quos mihi carissimos, atque in liberorum loco habeo, non solum vigilare, adesse, providere, sed etiam pugnare, & mori paratus. Equidem me Ducis nomine Patres appellarunt, ego patriæ militem dici volo; &, si regius hic ornatus impedimento mihi est, quominus vobiscum unâ in aciem prodeam, date gregale sagulum, quo turbæ immixtus præliantium vitam meam hostium telis objiciam. Nam

neque grata est dignitas, quæ vitam servat incolumem ad intuendam patriæ everfionem, neque acerba mors, quæ naturæ debita patriæ donatur.

Quâ Ducis extremâ oratione permotus populus dicentem interpellat, & magnis clamoribus cohortatur, ut sibi consulat, & vitam suam ad Reipublicæ utilitatem reservet, universique discedentem ex concione lætissimo plausu prosequuntur, & se ad omnia belli pericula paratissimos esse confirmant. Itaque, cum pro operum magnitudine, & stationum multitudine, tametsi duodeviginti fermè hominum millia quotidie essent in armis, tamen parum videretur esse defensorum, Senatusque consultum factum esset, ut lecticarii, servi que omnes puberes armarentur, non dominus fuit, qui familiam offerre, non servus, qui no-

men

men dare recusaret; ipsasque videre erat primarias Fœminas, Senatoresque, non, ut antea, stipatos grege familiarium, sed uno vix famulo comitatos in publicum prodire. Una omnium occupaverat animos patriæ cura, & quæ prosperis temporibus pudori fuissent, faciebat calamitas Reipublicæ, ut laudi ducerentur.

Mittuntur Comes Lannionensis, & Augustinus Pinellius, quorum alter Gallis, alter Liguribus, atque uterque, mortuo Canevario, Scoffaræ præsit. Hi arcem Turriliam vano ab hostibus metu derelictam recipiunt. Arx contra Masonia, præsidiumque per eos dies, adacto cuniculo, in potestatem Austriacorum venit; id quod in tantâ militum paucitate Genuensibus accidit perincommodè.

At Sculemburgius Subalpinorum
auxi-

auxiliis confirmatus in Bisamnatem vallem erumpere, &, quæ pars Urbis ad orientem spectat, patetque maximè, atque infirmior est, hanc adoriri constituit. Id ne a principio spectaverit, & adventum præstolans Subalpinorum tandiu distulerit, an alterius partis oppugnandæ difficultate admonitus situm postea Urbis accuratius perspexerit, non sanè constat. Illud videtur certò esse ponendum, oppugnari Genuam faciliùs potuisse, si exercitum Austriaci in Bisamnatem vallem statim adducere maluissent, quàm munitissima Porciferæ vallis loca carptim tentando prima belli tempora Borboniis, & Genuensibus prodere.

Pridie id. Jun. circumspectis diligentissimè Sculemburgius, & paratis, quæ ad eruptionem pertinent, jussis

Sub-

Subalpinis omnibus, & Austriacorum cohortibus aliquot ab alterâ Urbis parte Genuensium præsidia tentare, Geminorumque eodem tempore Fratrum montem simulato impetu invadere, ut ancipiti defensionis curâ distracti Genuenses, Borbonique a præsentis periculi suspicione averterentur. Ipse, triplici instructâ acie, tertiâ circiter vigiliâ castris egressus, Ferritoremque amnem, nullo repugnante, transgressus, expedito exercitu ita noctu iter fecit, ut sub lucis adventum ad Serram, quam vocant, Bavavorum perveniret, Ligures, qui ibi erant præsidio, paucos, & nec opimantes nihil negotii fuit opprimere, atque in fugam dare. His fugatis, ad faucem Rattorum, qui perangustus est in illis montibus aditus, & defendi opportunè poterat, eâdem celer-

leri-

leritate contendit. Militaris disciplinæ neglecta severitas magnæ sæpe in bello calamitati est, & tum fuit. Nam Helvetiorum manus de Hispaniensi exercitu, cui locus is ad defendendum obvenerat, cum sine ducibus, qui inamœnæ solitudinis tædio longius pernoctabant, remissiùs ageret vigilias, & omnia magis, quàm hostes, expectaret, repentino eorum adventu exterrita, perturbataque loco excessit. Quo Austriaci potiti, summumque nacti jugum rejectos ex loco superiore urgent Helvetios, atque hi, cum omnibus rebus premerentur, ægrèque resisterent, initium fugæ faciebant. At Taubenius Hispanorum Præfectus, qui ad Urbem erat, eâ re nunciatâ, cursu incitato, Cordubensis legionis manipulum secum adducens eò statim advolarat, atque hostes comprimere, suos-

suosque precibus, cohortationibusque firmare conabatur, ut se ex fugâ, & timore colligerent. Qui cum nihilo-feciùs fugere perseverarent, ille, ut videret, si posset exemplo retinere, quos verbis non poterat, districto gladio præcurrit ante omnes, gravi-que affectus vulnere, cum se sustinere non posset, inter militum manus e prælio ablatum est, duodecimumque post diem præstantissimus dux omnium luctu, & desiderio interiit. Fit pro-tinùs, vulnerato Taubenio, effusa Helvetiorum, atque Hispanorum fuga. Jam Subalpini reliquique Austriaci, ita uti inter eos convenerat, subito instructis copiis provolaverant, unoque tempore, & Arenarii munitiones, & Geminorum-Fratrum montem tentaverant. Facile Genuenses defendunt; celeriterque animadversum est,

maximas Austriacorum vires aliò spectare, neque id ab iis, nisi distingendorum hostium causâ, tentatum esse. Primâ luce, pulsîs Helvetiis, monteque occupato Rattorum, omnia ferè superiora loca, unde est propinquus in Bisamnatem vallem, Urbemque Genuam despectus, multitudine Austriacorum completâ conspiciuntur. Nam dextrum eorum cornu ad lucum usquè sodalium Camaldulensium, montemque Quetium pervaserat, Mariæque Montanæ fano imminebat; sinistrum autem in vallem Sturlam, omnibus circâ jugis occupatis, atque ad mare pervenerat; tantumque ab eâ parte terroris intulerat, ut Nazarianæ munitionis, quæ ad Albarensis tumuli radices constituta est, tormenta Borbonii, desperatâ defensione, abjicerent in mare, ne in potestatem Austriacorum

rum

rum venirent. Totâ interim Urbe fama percrebescit; non longè hostes abesse. Tacita primò , & tristissima admiratio; deinde conclamatur ad arma. Habetur Senatus. Complentur mœnia. Consulitur. Trepidatur. Genuenses usus ignari militaris ad Borbonios ora convertunt; quid ab eis geratur, expectant. Borbonii neque satis periti locorum, & veteranorum paucitati diffidentes animo magis, quàm consilio valent. Bouflertius ad portam progressus Romanam de Urbis defensione vehementissimè laborat. Austriaci intereà longiùs procedebant, & Mariæ Montanæ fanum jam occupaturi videbantur. Tum Marchio Ledensis, qui fano præerat, cum se nullâ satis munitione tutum adversùs hostes arbitraretur, præsertim quos recenti successu efferri videret, Bou-

flertium crebriores per nuncios facit certio- rem, quid faciendum existimet, & se, cum loco diffidat, receptum parare demonstrat. Ac primò Bou- flertius consilium ejus probat, postea monitus a Sicrio castrorum Præfecto de exercitu Genuensi, qui eò fortè advenerat, ne amplam, relicto fano, oppugnandæ Urbis occasionem hosti- bus præberet, locum pugnacissimè de- fendi jubet, &, cum se jam Leden- sis recipere cœpisset, summittit ei Roccapinium affinem suum, strenuum ducem, & paratum, qui aliis raptim additis munitionibus, allatisque tor- mentis, assiduo jactu telorum consi- stendi hostibus facultatem non dabat. Non tamen dubium fuit, quin, si, dum Leden- sis trepidat, Bouflertius consultat, confestim Austriaci irrupis- sent, locus esset amissus, qui ad de-
fen-

ensionem Urbis maximæ erat opportunitatis.

Ita parvæ res magnum in utramque partem momentum habuerunt. Nam & negligentia Helvetiorum aditum propè ad Urbem hostibus dedit, & fortuitus Sicrii adventus salutem Genuensibus attulit: eoque die non tam virtus fuit Austriacorum laudanda, quæ viarum, locorumque difficultates supervadere aggressa celerrimè superavit, quàm Genuensium visa est admiranda fortuna, quæ quâdam suâ magis vi, quàm defensorum industriâ celeritatem hostium, victoriamque retardavit. Sculemburgius enim sive rem nimis facilem, sive nimis difficilem arbitratus, atque in facilitate insidias, in difficultate laborem ex tantâ militum defatigatione veritus vacuum Ledenſis receptu Mariæ Montanæ

tanæ fanum occupare neglexit (id quod erat ei omnibus modis conandum) deterritusque etiam, quominus propiùs Urbi succederet, munitionibus iis, quas in Albarenfi suburbano superioribus diebus Genuenses instituerant, in valle Sturlâ substitit, nactusque desertam quamdam secundùm mare Turrim, eam duobus impositis tormentis communiit, eoque ab Sexto, quæ ad oppugnationem Urbis pertinebant, comportari imperavit: unoque tempore, & advectis majoribus tormentis oppugnare Genuam ab eâ parte, & arctiùs obsidere constituit, naviculis, quæ magno erant Genuensibus usui ad commeatus subvehendos, duplici periculo perterrefactis; cùm, si litus legerent, vexarentur ab Turri, si altum tenerent, deprehenderentur a Britannis; percrebue-

bueratque rumor extremam esse in Urbe famem, grandique macie torridum populum sordidissimis rebus tolerari; ut Civitatem ad voluntariam etiam deditionem inopiâ cogi posse Britannis persuadere Sculemburgius vellet. Sed Britannicæ classis Præfectus navarchum in scaphâ Genuam cum caduceo miserat, qui per causam reddendæ publicè literæ statum Civitatis diligentius specularetur; atque is in Urbem intromissus, opiparâque a Boufletio mensâ acceptus, dum ad Prætorium deducitur, reduciturque ad scapham, cibariorum copiam in viis expositam, quam etiam de industriâ Genuenses adauxerant, populique alacritatem conspicatus, quæcumque viderat, Præfecto renunciavit. Senatus etsi intelligeret, cuius rei causâ missus navarchus esset, qui nihil gravio-

ris

ris negotii attulerat, tamen non inutile judicavit ad deterrendos hostes, videre ipsosmet, quàm parata essent omnia ad Urbis defensionem.

Respiraverant interim Genuenses, & Austriacos, qui præter opinionem non vicerant, pro victis habebant. Diem noctemque in operibus, in muris versabantur. Hispani, Gallique præsto erant milites, ducesque. Aderat omnibus hortator Bouffertius, nullumque sibi ad quietem tempus relinquebat. Sacerdotes ipsi, quibus postea ex S. C. gratiæ actæ sunt, offerebant se, armatique vigilias, atque excubias agebant. Ducebantur fossæ, extruebantur aggeres: Mariæ inprimis Montanæ fanum, atque Albarense suburbanum propter loci opportunitatem, continuatis operibus, muniabantur. Loricis adjectis, muni-

men-

mentisque fossarum perfectis, mœnia, quæ circa Bisamnatem vergunt vallem, ab hostium incurſu defendebantur. Tentabant prætereà, quo poſſent pacto & Austriacos in ſuis divexare munitionibus, & Britannos ſubmovere, ne tormenta ad Sturlam liberè exponerent. Pontonem enim, quod genus eſt navis grave, & latum, eoque in portu ad materiem, ſaxaque convehenda uti ſolent, duobus tormentis, duobuſque item mortariis inſtructum, laneiſque obtectum culcitris ad defendendos milites ab ictu telorum, multis adductum funibus, ſcaphiſque, cum duabus præſidio triremibus, contrà Sturlam collocaverant, olleiſque repente incendiariis, continentique telorum jactu Austriacorum munitiones, & Britannicas naves infeſtas habere cœperant. Sed,

90 DE BELLO ITALICO ,
coortâ tempestate , & Genuenses in
portum se recipere , & Britanni in
altum vela dare coacti sunt . Crebra
etiam terrâ , dum Austriaci irrumpe-
re , Genuenses , Borboniique repu-
gnare conantur , prælia fiebant . Co-
mes Lannionensis , & Augustinus Pi-
nellius , ne , progressis ad mare Au-
striacis , ipsi intercluderentur , Scoffa-
ram reliquerant , præsidioque arci
Turriliæ paucis militibus , Liguribus-
que relictis , ad Reccum sese , Mar-
garopolimque receperant .

At Paris Pinellius Augustini Fr.
Eques Jerosolymitanus monte Fascen-
si depellere Austriacos aggreditur . Te-
nebatur ab iis mons duobus satis fir-
mis præsidiis , & , quòd non longè
eorum aberant castra , facilè erat iis-
dem , quodcumque submittere mili-
tum . Erant cum Pinellio Ligures.
nume-

numero cl. Rei aliquis difficultatem, periculique magnitudinem ostenderat: sed Pinellius, quia, relicta Melita, ad primum laborantis patriæ nuncium Genuam venerat, magnum aliquod pro Republicâ efficere properabat, incitabaturque gloriæ cupiditate, & naturæ quâdam ferociâ, inconsultâque rei bene gerendæ, fiducia. Neque ejus cupiditati Ligurum studia defunt, & audaciam a principio fortuna prosequitur. Nam primum hostium præsidium, circiter quadraginta interfectis, expugnat. Hâc re animadversâ, ii. millia expeditorum militum subsidio suis Austriaci mittunt suspicati, paucis præmissis, multò majorem affore Ligurum manum. Ne hæc quidem res ab spe, impetuque Pinellium moratur, temerèque progressus prælium cum tantâ

Pars II. M ij hostium

92 DE BELLO ITALICO,
hostium multitudine committere, locumque adoriri præmunitum non dubitat. Neque vario certamine pugnatum est, cum Austriacorum numero deterriti Ligures præcipitem subitò incertis itineribus, per silvas, & montes fugam arripuissent. Ictum jaculo Pinellium, & prolabentem ægrè humeris impositum Ligur e prælio quidam auferre conatur. Vulneratus Ligur vulneratum relinquere Pinellium cogitur, cujus statim Austriaci conclamantes victoriam caput præcidunt. Deposcenti tamen Fratri corpus ad sepulturam conceditur: cumque funeris causâ relatum Genuam esset ad exequias cohonestandas frequentissima convenit civitas, gravitèrque doluit, tantam fortitudinis indolem abreptam ætatis, & gloriæ æstu quodam tam citò defecisse.

Dum

Dum hæc ad Genuam geruntur, Bellinsulanus, educto ex hibernis exercitu, fratrem suum Equitem Jerosolymitanum, virum & consilii magni, & virtutis, receptis Lerinâ, Planasiâque insulis, cum cohortibus xv., equitibusque nonnullis Ocelum versùs in eas partes, quæ Barcinonetam vallem attingunt, proficisci jubet; ipse, exploratis hostium rationibus, aliud capit initium belli. Minensis, & Bellinsulanus, conjunctis, transductisque flumen Varum copiis, eâdem celeritate, quâ fuerant relictæ, Nicæam, Montem-Albanum, Villamque Francam oppida recipiunt, atque ad Albintemelium perveniunt, arcemque oppugnare instituunt, eodemque tempore Pignattellium præmittunt, qui cum primo agmine Remopolim progressus, quàm possit latif-

latissimè ostentationis causâ pervagetur. Leutronius, qui jussu Regis Sardiniae eis locis præerat, simul ac adesse Borbonios cum ingenti armatorum multitudine nunciatum est, quorum adventum, viresque fama, ut fit, multis auxerat partibus, primò ad montes se convertit, qui Oneliensem tractum cingunt, approperatisque munitionibus irrumpentes demorari Borbonios cœpit. Sed postea, deditione ipsius arcis Albintemelii cognitâ, quæ per eos dies facta fuerat, cum ne montibus quidem, & munitionibus satis confideret, atque eum omnia deesse viderentur, missis confestim ad Sculemburgium, Roccæsiumque nunciis, quanto ipse in discrimine versetur, ostendit; nec se hostium impetum sine eorum auxilio sustinere posse perscribit. Illi eodem periculo,
iisdem

iisdem permoti rumoribus, quas instituerant, disiectis munitionibus, impositisque in Britannicas naves tormentis, receptum parabant. Quæ dum administrant, redduntur iis interim a Rege Sardiniaë literæ, quibus oppugnationem Genuæ, omiſſis omnibus, quàm maturimè perfici jubebat, eamque, auditâ Sculemburgii in Bisamnatem vallem eruptione, ad exitum spectare arbitrabatur. Itaque rursus exponunt Britanni tormenta, rursus apparantur aggeres, iterumque oppugnationis fervet, & summâ utrinque vi certatur. Postea verò quàm Bellinsulani Fratris copias ex alterâ parte ad alpes augeri, ex alterâ Bellinsulanium ipsum, & Minensem, captâ arce Albintemelii, secundùm mare ad liberandam Genuam accelerare, nec tantis rebus gestis, ullo
adhuc

adhuc Genuæ mœnia telo attingi potuisse cognovit Sardiniae Rex, simul a Præfecto Britannicæ classis certior factus est, nihil esse in obsidione spei adversus Genuenses, qui omnibus rebus abundabant, rei moram timens, & desperans exitum, commutato repentè consilio, suas e Liguriâ copias revocat, debitaque ex fœdere Austriacorum auxilia a Sculemburgio reposcit. Namque admodum verebatur, ne, copiis dissipatis, atque interclusis suis, ab hostibus circumfisteretur, neu, dum alienis inhiebat, sua ipse amitteret.

Abstrahebatur ægrè ab oppugnandâ Genuâ Sculemburgius, certamque sibi eripi e manibus victoriam querebatur, & sunt etiam plerique, qui existiment, futurum fuisse, ut Genua expugneretur, si perseverare in op-

in oppugnatione Sculemburgio licuisset. Sed Roccæsius, acceptis ab Rege suo mandatis, discedere cum Subalpinis properabat, jamque anchoras moliri Britanni videbantur, quorum auctoritate necessariò Austriaci movebantur. Itaque, concilio advocato, cum discedere constituissent, Roccæsius suarum partem Leutronio copiarum auxilio misit, partem ipse in Subalpinos duxit: Britanni, contractâ classe, tormentis, impedimentisque exercitus, & nonnullis Austriacorum, quæ ad Regem Sardiniaë breviori itinere mari adducerentur, cohortibus in naves impositis, e conspectu Genuensium Savonem, Vadumque Sabatium concesserunt. Sculemburgius, reliquis cum expeditâ manu præmissis impedimentis, relictâ Sturlâ, atque aliquot ad Turraciam, in Porciferâque deinde valle moratus dies, & Ligusti-

cas, non insecutis Genuensibus, quietissime transgressus fauces, in Galliam Cisalpinam rediit. Quò cum venisset, exercitum, atque imperium Brounio tradidit, ipse in Germaniam profectus est.

Genuenses, recuperatâ patriâ, reliqua ferè omnia amiserant maximis affecti detrimentis, atque internecini belli sumptibus exhausti, cujus belli tetra extabant vestigia, prostratæ villarum fores, deusta tecta, & nihil sancti, amœnive circa Urbem integrum a clade, & vastitate relictum. Neque verò in discessu hostium gaudere ex animo poterant, quòd & fortunas everfas suas intuebantur, & perculerat eos gravissimè Boufletii mors, qui eodem illo die, quo discesserant hostes, pustularum morbo consumptus interiit. Cujus cognitâ morte, tantus Civita-

tem mœror oppressit, ut, si capta ab hostibus Urbs fuisset, non minor futurus videretur: adeo ex unius hominis interitu deserta omnia, horrida, & ingenti quasi muta dolore erant. Senatus Regii Legati auctoritatem, Populus nobilissimi Viri liberalitatem, amorem uterque erga Rempublicam, fidemque magnam desiderabat, mœrebatque vehementissimè. Ibî tum Chovelinius tanto Civitatis luctu permotus in curiam ultrò venit, Senatūque mœrentem multa Regis sui nomine amantissimè pollicitus recreavit, hortatusque est, ne caderent animis, neu, Galliæ Rege superstite, quicquam cuiusquam casu de Reipublicæ præsidio detractum arbitrarentur: maximum se quoque dolorem cœpisse ex interitu talis vel ducis, vel amici; tamen, privato compresso luctu, non potuif-

se non accedere ad eos consolandi gratiâ, quorum & amicitiam a Rege suo plurimi fieri, & virtutem æstimare intelligeret; e cujus virtutis, regiæque benevolentix magnitudine, & vi peterent ipsi eam consolationem, quam nemo alius adhibere majorem posset, quæque forti, & constanti Senatu digna esset, susceptumque ex unius mortalis obitu mœrorem libertatæ patriæ gloriâ, Regisque maximi, atque optimi amicitia mitigarent. Confirmato Senatu, Concilium habetur Majus, in quo cum ex S. C. verba Dux fecisset, ut mortuo Bouffertio honos haberetur, de eâ re ita Patres censuerunt: Cum Dux Bouffertius difficillimis temporibus missus a Rege Galliæ ad Rempublicam Legatus fuerit, in eâque legatione virtute, imperio, liberalitate, maximo usui Rei publici-

publicæ fuerit, cum talis Vir in eâ-
dem legatione mortem obierit, Patri-
bus placere, Ducis Bouflertii, liberos,
posterisque honoris ergo Cives esse no-
biles Genuenses; itemque iis (quod
honoris genus ante id tempus nemini
tributum erat) Bouflertiæ gentis insi-
gni Reipublicæ insigne apponere lice-
re. Ipsi Duci Bouflertio Senatus mo-
numentum decreverat marmoreum cum
inscriptione præclarâ, quæ virtutem
illius, & gratum amplissimi ordinis
animum declararet. Liberatæ Genuæ
nuncium, qui sociis, amicisque Regi-
bus apportarent, Marcellus Duratius
in castra Regis Galliæ apud Belgas,
Hieronymus Balbus in Hispaniam ex
S. R. C. mittuntur, Laurentioque Im-
periali, qui Neapoli erat, mandatum
est, ut eam rem Carolo Regi renun-
ciaret, per eosdemque Legatos gratiæ
Regi-

Regibus actæ sunt, quòd in maximo discrimine Rempublicam adjuvissent.

Interim in locum Taubenii substitutus a Minensi Augustinus Ahumada castrorum Præfectus, & missus a Bellinsulano, qui, mortuo Bouffertio, toti exercitui præesset Marchio Biffiensis Gallici equitatus Præfectus Genuam pervenerant. At Bellinsulanus, & Minensis, cognito Austriacorum ab Urbe Genuâ discessu, de reliquo bello consultabant; magnaue inter eos extitit controversia. Nam Minensis pergendum porrò, &, dum hostes trepidarent, arcem esse expugnandam Savonensem arbitrabatur, quòd, eâ expugnata, & confirmatis Genuensibus, facile omnia patere consideret, neque aliâ ratione in Cisalpinam Galliam bellum transferendum crederet, atque antea a Philippo Ferdinandi

dinandi Regis Fr. translatum fuerat. Contra ea Bellinsulanus, & illius expeditionis infelicem detestabatur exitum, & per Cottias Alpes multò faciliore in Taurinos itinere perveniri posse censebat: habere se ab exploratoribus compertum ajebat, eam partem negligentius ab hoste servari, quòd nimium naturâ loci confideret: itaque audendum potius, quòd neglectum ab hoste facilem habeat victoriam, quàm quod prævisum difficultatem augeat vincendi: refractis autem Alpium claustris, eò Regem Sardiniae necessariò descensurum, ut pacem ultrò petat, eoque pacato, quod reliquum Austriacis in Italiâ præsidium? quam spem? Hæc propalàm dicebat: illa tacita suberat cura, ut Equiti Bellinsulano Fratri, cujus ea res imperio permittebatur, occasio da-

104 DE BELLO ITALICO ,
retur fortis alicujus , & memorabilis
facinoris , dignusque propterea Galli-
cæ militiæ Magisterio haberetur apud
Regem : Fratrem Bellinsulanus amabat
unicè , ejusque in maximis rebus con-
silio , atque auctoritate semper uteba-
tur , & Magisterii a Fratre honorem
summè sciebat expeti . His de causis
cum suæ Bellinsulanus sententiæ insi-
steret , neque a suâ Hispanus Minen-
sis removeri posset , ad suum quisque
Regem ejus negotii arbitrium rejecit .
Quid Reges responderint , non sanè
constat ; in suo uterque certè impera-
tor consilio perseveravit , & quâdam
fatali ducum dissensione eo quoque an-
no factum est , ut res jacerent Borbo-
niorum , & Galli etiam cladem acci-
perent insignem . Nam Bellinsulanus ,
arce permunitâ Albintemelii , in Ni-
cæensem agrum reduxerat exercitum ,
ut eas

ut eas copias distineret, quas in Salutiis Sardiniae Rex habebat, magnaue interim Equiti Fratri auxilia submiserat. Quibus ille fretus, alpibus superatis Cottiis, ad munitiones, quas in Affientensi colle Subalpini fecerant, converso repente agmine, profectus est. Erant, inductis auxiliis Austriacorum, quæ pridie venerant, frequentiores hostes in munitionibus, omniaque ad repugnandum paraverant. Difficillimus erat, & munitissimus naturâ, manuque locus. Explorata hæc eadem Equiti Bellinsulano erant, sed tantam habebat suarum rerum fiduciam, eâque efferebatur cupiditate vincendi, ut nihil virtuti suæ arduum, nihil difficile existimaret. Itaque in locum progredi iniquum non dubitat, commissoque prælio, in hostium munitiones irrumperere conatur, Gallique milites, quorum

rum in primo impetu ferocitatis opinio est singularis, audacissimè succedunt. Sed nullus virtuti locus relinquebatur in tantâ loci iniquitate, & cum undique ex superiore loco telis, jaculisque obruerentur, acervatim cadebant milites, ducesque; fœdissimaque fiebat cædes. Ibî Eques Bellinfulanus, cum neque pugnantes hortando sustinere, neque fugientes castigando revocare posset, signifero cui-dam signo detracto in primam aciem processit, superatoque aggere, in ipsâ hostium munitione summâ signum defixit, videbaturque incredibili audaciâ prælium restitutus, nisi fortissimè pugnans interfectus esset gloriosâ magis morte occumbens, quàm, quæ prudentem deceret ducem. Sic magnâ Gallorum parte interfectâ, reliquis fugatis, atrocissimam nox pugnam diremit.

remit . Tanto Dux Bellinfulanus publico , privatoque luctu perculsus tum demum Minensis imperatoris Hispani accedebat sententiæ , ut Savonem versùs exercitus adducerentur . At Minensis , quod primùm , repugnante Bellinfulano , vehementer suaserat ; post , concedente , perficere noluit amissam querens occasionem ; ut esse contentionis , quàm victoriæ cupidior videretur . Itaque non jam ut aliquid acquirerent , prælioque hostes lacefferent , sed ut repugnarent , & , locis munitis opportunis , Nicæensem inprimis agrum tenere possent , Borbonii cogitabant .

At Regi Sardiniaë multa de bello cogitanti , cognitis his rebus , subiit animum impetus in Galliam iterum Narbonensem invadendi . Itaque suis Austriacorumque copiis contractis , & consilio cum Brounio communicato ,

qui Mediolano profectus Augustam per eos dies Taurinorum venerat, Austriacos Brigantium versùs eruptionem facere jubet, ipse per Sturam vallem eòdem erumpere conatur non spe quidem, quæ vana toties fuerat, Galliæ obtinendæ Narbonensis, sed consilio avertendi Bellinsulani ab agro Nicæensi, quem agrum Borboniorum præsidio nudatum Leutronius occuparet. Sed consilium quoque ejusmodi frustrà Austriacis, Regique Sardiniaë fuit, qui, levibus aliquot factis præliis, rejecti, vexatique in Subalpinos, Galliamque Cisalpinam redierunt: & Bellinsulanus Austriacorum comminatione adeo permotus non est, ut cohortibus xx. deductis e Galliâ Narbonensi, quam satis loci naturâ, appropinquansque prægelidus in Alpibus defendebat autumnus, suum in Italiâ exercitum

auge-

augeret, Leutronioque depulso, qui arcem Albintemelii circumvallaverat, comneatum in arcem importavit. Quo facto, deductis paulò maturiùs, quàm tempus anni postulabat, in Galliam Narbonensem in hiberna exercitibus, & cohortibus xxx. præsidio Nicæ, Villæque Francæ relictis, Bellinfulanus Lutetiam, Minensis Matritum revertitur, & Philippus Ferdinandi Regis Fr. Civaronem, Dux Mutinensium Venetias profectus est: multusque de pace sermo esse cœpit, quam Britanni, Gallique potissimùm, colloquio primùm Bredæ, deinde Aquisgrani habito, conciliare studebant.

At Genuæ Marchio Bissiensis, cum Urbem ex diuturnâ obsidione multarum rerum necesse esset inopiâ laborare, partis ex hostico prædis, eam recreare, & militum etiam, Ligurumque

gurumque animos belli præmiis confirmare constituit. Itaque satis exploratis rebus, cum magnâ Ligurum, & Legionariorum manu Chovelenium, Belloesiumque bipartito in expeditionem misit. Chovelenius in Montemferratum, transgressus Apenninum, Belloesius ex Apuanis montibus descendens in Parmensem agrum irrumperet, uterque prædas ageret, &, si quid loci, & temporis opportunitate proficere posset, ne omitteret imperatum est. Nadaesium interim, qui circa Gavium, Octaviumque esse consueverat, & progredientem demorari Chovelenium poterat, Montecunius de exercitu Gallico Trib. mil. distineret. Montecunius modò procurrens, modò recedens Nadaesium semper, itaque habuit occupatum, ut averteret hominem ab inferendâ rebus morâ, quæ
gere-

gerebantur. At primò Belloesium Biffiensis, post Montelium, qui Belloesio successerat, effusè prædantium negligentia ab incæpto retraxit. Tantâ autem locorum ignorantia peccatum est, ut maxima militum pars divisa, interclusaque in potestatem agrestium veniret, qui vim, armis arreptis, prohibere cœperant. Chovelenium, cum primo impetu Saxellum, qui locus abest a Vulture oppido xx. millia passuum, captis præsidiariis nonnullis, reliquis in fugam conjectis occupasset, & satis optimâ abactâ prædâ, longius progrediretur, ejusmodi repente adortæ sunt tempestates, ut apud timidum vulgus prodigii loco haberentur. Nam plures de cœlo tacti homines, evulsæ radicitus arbores, decussa tecta dicebantur, & continuatione imbrium adeò flumina creverant,

rant , ut omninò transiri non possent . Itaque intermisso itinere , infestâque re Chovelenius quoquè Genuam sese recipere coactus est .

Quæ cum essent acta , Genuam venit Dux Riceliensis Gallici exercitus in Belgio Legatus , magnamque sui expectationem concitavit tantâ Vir nobilitate , atque apud Regem gratiâ . Honorificentissimè exceptus Senatum statim adiit , itaque eum est allocutus , ut intelligerent Genuenses , incolumitatem eorum Galliæ Regi magnæ curæ esse , seseque ipse diceret , eandem erga eos fidem , diligentiamque laboraturum , ut præstaret , quam Bouffertius præstitisset , cui succedebat , & quem triste sui apud illos desiderium reliquisse cognoverat . Dux cum responderet , Galliæ Regi maximas , uti par erat , deinde etiam Legato gratias

tias egit, quod permagnum sibi, Senatuque, & perhonorificum videbatur, potentissimo Regi tantæ curæ esse salutem Reipublicæ, ut Legatum ad eam mitteret clarissimum hominem, & quem sibi charissimum haberet. Quibus rebus confectis, ad belli cogitationem sese Riceliensis recepit, eaque maxime loca, unde in Bisamnatem vallem Austriaci irruperant, recenti casu admonitus diligentissimè muniri iussit.

Campus, quem Frigidum vocant, vicus est, qui a Monteferrato venientibus in finibus occurrit Reipublicæ Genuensis. Campenses, cum se prædæ Austriacorum comites esse mallent, quàm socios Genuensium in rebus adversis, magno erant hostibus usui ad exploranda itinera, prædamque tollendam. Hoc priùs hostibus præsidium,

Pars II. P quàm

quàm quicquam tentaret, detrudere Ricelienſis conſtituit. Sed hunc ii locum egregiè muniverant, duabusque cohortibus tenebant, adeo ut, & naturâ montium, quibus undique continebatur, & opere, defenſorumque copiâ firmiſſimus haberetur. At Ricelienſis exploratoribus, perſugiſque credens, qui aliter renunciabant, in ſpem venerat potiundi loci. Itaque ſub adventum ſtatim ſuum mittit eò Hiſpanorum, Gallorumque millia vii. Ipſe ad Marcaroli (ita enim vocant) mapalia progreſſus Nadaſtium tenebat, quin ſubſidio ſuis iret. Sed cum primum ejus agmen conciſum, rejectumque ab Auſtriacis eſſet, & Nadaſtius, majoribus ex Ciſalpinâ Galliâ coactis copiis, non minimum terrorem inferret, ſimul perſpecta melius ex propinquo loca ardua maximè viderentur, nulum-

lumque ferè tormentis ad oppugnationem necessariis aditum darent, tum autem tempus anni subesset nimis in montibus horridum, atque asperum, non tanti esse duxit Riceliensis vicum illum obtinere, ut in ipso imperii sui initio magnum aliquod detrimentum propter iniquitatem loci, temporisque exercitus acciperet. Itaque Campi Frigidi oppugnatione dimissâ, Genuam revertitur.

Per idem fermè tempus gravissimo Genuensibus bello intentis nuntiatum est, rates quasdam Ligusticas captas a Britannis esse ad Viaregium, qui locus Lucensium est, egregiusque ad tenendas anchoras habetur. Rates, cum Britannorum aphractos insequentes fugerent, partim in Viaregii seestationem contulerunt, atque ad Turrim, quæ ibi est, refugerunt, partim

curſu ſuo longius deceſſere, quàm ut protegi a Turri poſſent. Navicularii autem Ligures ii, qui longiùs a Turri curſum tenuerant, in terram cum armis egreſſi, tametſi pauci eſſent, tamen Britannos arcebant jaculis, ratesque tutabantur, quas fluctuantes in ſalo reliquerant. Britanni, cum ipſi quoque in terram exiſſent ardore pro-
vecti pugnandi, repulſis naviculariis, duobuſque deſideratis claffariis, remulco rates abduxerunt. Illi interim, quos primò ad Turrin refugiſſe diximus, ſubſidio ſuis, quod natura fert, ire parabant. At prohibuit, qui ad cuſtodiam Turris Lucenſium nomine præerat. Nefas enim eſſe duxit ſub oculis ſuis erumpere Ligures ad alienam perniciem, neque e Republicâ ſuâ eſſe iudicavit cauſam offenſionis Britannis dari, qui potentiores
res

res erant, benignèque cum eâ agere dicebantur. At Navicularii, ejusmodi prudentiæ rationes, qui non satis intelligerent, & defensionis se jure spoliatos quererentur, palàm, adeoque graviterque Lucenses accusarunt, ut hominum querelas non negligendas videri Senatus Genuensis censeret. Lucenses cum Genuensium immutatam ex eo voluntatem accepissent, doluissentque, ne hâc de causâ quicquam de veteri illâ detraheretur conjunctione, atque amicitia, quam summo semper studio coluerant, Joannem Sardinium miserunt civem suum, qui ea diceret, quæ ad controversiam componendam, placandosque Genuensium animos pertinere arbitraretur. Quibus Genuenses auditis & Ricelienſis commoti officio, qui Lucenses etiam, atque etiam Senatui commendaverat, vetu-

vetutissimam non abrumpendam esse amicitiam existimarunt; cum præsertim Lucenses, nequid postea tale contingeret, Viaregium intentiore custodiâ, additâ militum manu, servaturos se esse pollicerentur.

Nondum erat hyems confecta, & studio ardentes ulciscendi, nihil prioris obsidionis deterriti exitu ad oppugnandam reverti Genuam Austriaci constituerant. Quin etiam proximæ obsidionis eventu multis de rebus admonebantur, quæ facilem redderent insequentem, & tantæ erat terrestri, maritimæque opportunitatis Urbs Genua, ut eâ relictâ, corruere omnis Italici belli ratio videretur. Primum erat eorum consilium Delphini, Lunæque portibus potiri. Quibus in potestatem redactis, adjuvantibusque Britannis, & ipsi omnibus abundarent

darent rebus, & nullus toto mari Genuensibus egressus, nullaue propterea spes commeatus relinqueretur. Ipsa autem defensorum multitudo, quæ Borboniorum confluentibus auxiliis admodum creverat, si commeatus deficeret, famesque urgeret, exitio potius, quam præsidio futura Civitati videbatur. Itaque Brounio peritissimo imperatore, magnis circum Mutinam, Parmamque contractis copiis, magnis item constitutis horreis, in eam Ligustici litoris partem, quæ ad orientem spectat, per Apuanos montes quamprimùm descendere cogitabant; confestimque descendissent, nisi eos gravis adhuc hyems, durissimæque propter jumentorum penuriam necessariorum rerum subvectiones detinuissent.

At Borbonii, & Genuenses, qui Petrum-Franciscum Grimaldum summo cum

mo cum imperio in eas partes miserant, aliosque ei nobiles adjunxerant, de Austriacorum consiliis certiores facti, permunitis Suburbanis, arcem Delphiniam, arcem item Marianam, quæ in promontorio quodam portus Lunensis posita unum a terrâ, eumque perangustum aditum habet, Spediam præterea, Erycem, ipsiusque Lunensis portus fauces, insulasque, multis effectis operibus, collocatisque tormentis instruxerant; Sergianensem provinciam confirmaverant; arcem, oppidum muniverant: Laventiam, Massam, Carrariam, quæ pacati erant, quietique Principis loca, jure belli occupaverant, ne facultatem darent hostibus propiùs accedendi: Apuanorum montium angustias obsederant, valida ubique præsidia imposuerant: castra ad Segestam Tigulliorum, Clavarum-

varumque fecerant, seque ad defensionem omnibus rebus paraverant. Interim Riceliensis per Roccæpinium nonnullis terrâ, marique submissis centuriis, Subalpinos Varagini cccc. incuriosius agentes opresserat; perque Marchionem Montium Gallici exercitus Decurionem magnâ cæde Nadaftium Vulturem occupare conantem repulerat; ipse ad concilium magni momenti animum adjecerat, ut Savonem repentino incurfu occuparet.

Urbs est ad mare Savo ab Genuâ longè occidentem versùs millia passuum xxx., mœnibus, portuque fuc-cinta, duobus prominentibus lateribus, introrsùs retracto. Arcem habet inter occasum, & meridiem satis munitam, quæ tota ex saxo multis operibus extracta, præruptique scopuli dorso imposita ferè undique alluitur mari, al-

tâque ab urbe fofsâ disjuncta, versatili rursus ponte adjungitur. Ultra Savonem ad occidentem millia circiter passuum iv. Vadum est Sabatium, statioque navibus, projecto monte, tutissima, in eâque anchoras jecerat Britannica classis. In portu Savonensi triremes erant ii. Sardiniae Regis, erant in Urbe horrea constituta, erant arma, tela, commeatus omnis generis. Quæ omnia demere hostibus Ricciensis cupiebat, videbatque, Savone receptâ, neque Britannis locum esse in Vado consistendi, & omnem eam Borboniis, ac Genuensibus patere oram, quæ ad flumen Varum protenditur. Urbem, atque arcem Comes Roccafius tenebat præsidio non satis firmo Subalpinorum, paucissimique ex his excubare in arce consueverant. Savonenses Genuensi assueti impe-

imperio præsentēs oderant dominos, & nonnullis erat acerbè nimis a Subalpinis militari licentiâ imperitatum. Prætereà occulti a Savone nuncii Genuam venerant, qui cum multa alia, tum, quâ Urbs ad mare vergit, locum esse in mœnibus aptum insidiis renunciaverant, proptereà quod rimas murus egerat, laxarique adeo poterat, ut daret introeuntibus aditum, ibique fortè hedera inter saxa coaluerat, quæ multis opaca frondibus locum, dolumque occuleret.

Quibus Riceliensis cognitis, cohortes aliquot militum eò noctu mari mittere constituerat, quorum alii ab alterâ Urbis parte mœnia ex ascensu tentare simulant, Subalpinosque distinerent, alii per diductam muri partem silentio intromissi opportuna Urbis loca improvisò occuparent. Ne-

que dubitabat, quin repentino oppressis incurſu Subalpinis, adjuvantibus, recipientibusque Savonenſibus, inter tumultum captæ Urbis, nocturnæque concuſſationis fremitum arx ipſa vel dolo, vel errore aliquo in tantâ defenſorum paucitate capi facile poſſet. Itaque locum, tempus, ſignum conſtituit, nunciosque præmiis, pollicitationibusque incitados Savonem remittit: ipſe ut ab eo, quod parabat, in alterius rei curam converteret hoſtium animos, Segestam Tigulliorum proficiſcitur, eoque velut conventuros paratos eſſe milites jubet. Multus erat in conſilio cum Ahumadâ, agebat, loquebatur omnia, quæ ad arcendos ab eâ parte hoſtes pertinere videbantur. Cum repente magiſtris imperat navium, ut primo veſpere ſcaphas, atque onerarias Genuæ
ad por-

ad portum appulsas habeant , quot satis esse ad tria millia fermè armatorum transportanda existiment , Ducique Aginnensium , quem summæ rei præfecerat , quid fieri velit , ostendit , imprimisque monet , ut celeritatem adhibeat , noctuabundusque Savonem perveniat . Chovelenium interim Vulturem præmiserat , qui per causam inspiciendi exercitus copias contraheret : ipse eodem paulò post advolarat , & cum cohortibus vii. , quas Chovelenius contraxerat , Savonem terrâ progrediebatur . Ahumada cum reliquo exercitu subsequebatur , relictis , qui montium juga tuerentur , hostemque levibus præliis laceffendo detinerent . Summa erat maris tranquillitas , coelique , appropinquante nocte , serenitas . Sed cum esset ab iis , qui naves cgebant , paulò tardius res administrata ,
factum

factum est magnâ totius negotii perturbatione, ut, qui primâ vigiliâ milites solvere debebant, secundâ naves conscenderent. Interim, tempore commutato, fluctibus dubiis volvi, cœptum est mare, imberque accidit navigantibus gravis. Seriùs his de causis confecto Dux Aginnensium cursu, ortâ jam luce, Savonem conspexit. Itaque, patefactis insidiis, paululùm regressus vi apertâ propalàm uti non dubitavit, atque inter Cellem, Albiolamque exscensione factâ (quæ loca non longè ab Savone absunt) Urbi colles imminentes occupat, horreisque, quæ ad Urbem erant, incensis, ipsam circumvallare Savonem instituit. At Riceliensis cum id, quod prudentissimè cogitaverat, malè cecidisse videret, & vim tentare periculosum duceret, Genuam sese recipere statuit, idem-

idemque uti faceret, Duci Aginnensium imperavit. Subalpini cum in neminem quempiam insidiarum culpam conferre, cognitâ causâ, possent, & tamen insidias factas suspicarentur, omnibus irati Savonensibus, eos, imperatis pecuniis, principibusque in custodiam conjectis, durissimè habuerunt; ut, quoniam amari non poterant, quod multò est in imperio firmiùs, timerentur.

Erant interim in agro Nicænsi a Borboniis levia quædam, eaque secunda facta prælia, ad exercitumque Bellinfulanus, & Minensis redierant; Leutronius autem suis se locis tenebat. At Brounius, ut jam medium veris erat, in Tari valle contracto exercitu, omnibusque comparatis rebus, cognitâ locorum naturâ, minis, pollicitationibusque variè, frustra que tentatis Ligurum

gurum animis , triplici denique instructâ acie , Genuensium finibus appropinquabat . Erant armatorum xl. circiter millia ; numero præstabant ; & tot exercitati præliis virtute valebant . Primo præerat agmini Maguirejus , per ipsosque Apuanos montes iter faciebat . Dextrâ montem Boccum occupare Andræasius , sinistrâ montem item Furtianum tenere Harchesius jussus erat . Alterum ducebat agmen Marchio Clericius , cui mandatum erat , uti eodem tempore Apuâ movens ad portum descenderet Lunensem : & quia ad omnia tuenda non satis esse Borbonii , & Genuenses poterant , cum tanta undique irrumperet hostium multitudo , & totius servandi causâ partem negligere videbantur , erat Nadaastio imperatum , ut per occasionem Ligusticas superaret fauces , in Porciferamque

que vallem decurreret. Maguirejus primo aspectu perterritis Borboniis, Liguribusque, qui, relictis Apuanorum montium jugis, ad Oxarium montem subitâ se fugâ receperunt, Bare-tium pervenit; indèque progressus, vastatis longè latèque, atque incensis omnibus, magnum ubique terrorem intulit. Marchio interim Clericius, oppido capto Bruneto, regionem, quæ trans flumen Boactum ad portum pertinet Lunensem, occupaverat omnem.

Eodem impetu per iniqua progressus loca, fugatis Hispanis, montem Boccum, & Margaritæ fanum tenuerat Andræasius, quem procedentem intollerantiùs, neque dubitantem, quin, si mare nanciſceretur, omni Borbonios receptu intercluderet; Marchio primùm Mojensis Hispani exer-

130 DE BELLO ITALICO,
citus decurio tardavit, tum tantâ in
hostes vi irrupit, ut cccc. interfectis,
victores terga vertere Austriacos coge-
ret, statimque Margaritæ fanum re-
ciperet, & Boccum etiam, profligato
Andræasio, recepisset, nisi mandatum
ei repentè ab Ahumadâ fuisset, uti
ab insequendis, laceffendisque hostibus
omninò abstineret. Certi enim de pa-
ce nuncii venerant. At Nadaastius Li-
gusticas improvisò fauces transgressus
Petram Lavetiaram, Langensiumque
pagum occupaverat. Sed Genuensium
centuriæ aliquot cum subito appa-
ruissent, impetu factò, celeriter Au-
striacos perturbaverunt, atque ita per-
territos egerunt, ut non prius fugâ
desisterent, quàm in conspectu Octavii
vici trans Ligusticas fauces venissent. Ita
vario pugnabatur Marte, erantque
omnium intenti animi in ejus belli
casum

casum, in quo non solum Urbs Genua præmium erat futura victoris, sed etiam de Italiæ, atque Europæ forsitan totius statu decertatum fuisset. Tantæ dimicationem rei pacis repente sustulit nuncius.

Habito, ut diximus, Aquisgrani colloquio, inter Britannos, & Gallos condiciones convenere, quæ non sunt, præterquàm quæ ad Italiam pertinent, memoriæ nobis quidem prodendæ.

Batavi primùm trepidi rerum suarum, reliqui deinde omnes auctoritati paruerunt eorum, qui necessitati parere videbantur. Nam Galli victores foris, inopiâ domi dicebantur premi maximè rei frumentariæ, maritimâque neglectâ re, florentes in Americâ provincias retinere non posse. Britanni, alieno impedito, commer-

132 DE BELLO ITALICO,
cium imminuerant suum, sumptibus-
que terrâ marique ingentibus factis,
grande conflaverant æs alienum. Il-
lud etiam satis constat cunctis Gallis,
qui ut belli periculis non deterrentur,
ita diuturnitate franguntur, proclives
fuisse ad otium animos, atque ex
tanto tandem bello patriæ delicias re-
spicere cœpisse; & Regem ipsum in
medio rerum cursu, rarâ inter re-
gnantes moderatione, victoriæ tempe-
rassæ suæ, ut communi salutî consu-
leret, eoque fuit ejus mirabilior mo-
deratio, quo tot expugnatis in Bel-
gio arcibus, perterritis Batavis, invi-
cto exercitu, quæcumque alibi acce-
pisset bello damna, sarcire facilitè pos-
se videbatur, & peritissimi erant du-
ces, qui victoriâ uti suaderent. At
Rex quietam Europam, quàm suam
maluit, effecitque, ut in Aquisgra-
nensi

nensi colloquio repentina firmaretur pax, neque iis reverà utilis, qui fecerant, neque iis, qui acceperant magis, quàm probarant. Illi nihil in pace retinebant eorum, quæ maximis factis jacturis, aditisque periculis bello cæperant, his necessitas imposita pacis accipiendæ omnem repentè abruperat melioris spem fortunæ. Accisæ quidem omnium fortunæ, non tamen placata odia, neque, cum vires redierint, sublata novarum causæ dissensionum. Nisi fortè hæc est rerum humanarum instabilis conditio, ut paci bellum, bello pax varietate perpetuâ succedat, & quam hominum consiliis rerum mutabilitatem assignamus, universæ potiùs naturæ, æternarumque nexui causarum tribuenda est. Fuere ad Aquisgranense colloquium eorum Legati Principum
adhi-

adhibiti, qui bellum gesserant; Legatique fuerunt Britanniae Regis Comes Sanduicensis, & Eques Robinsonius; Regis Galliae Comes Sanseverinas Aragonius Placentinus, & Eques Portensis; Reginae Ungariae Comes Caunitius; Regis Hispaniae Massonius Limensis; Regis Sardiniae Comes Cavannensis; Batavorum Comes Bentinchi, aliique cum eo iv. Batavorum item Legati; Reipublicae Genuensis Franciscus Auria, quem ex S. C. in Britanniam missum Lutetiae remansisse diximus; & Ducis Mutinensium Comes Monsonius Legatus fuit. Fuere item alii ab aliis missi Principibus privati homines, qui, quid ageretur, explorarent, & tanquam ad aquas valetudinis causam venissent, Aquisgrani obversarentur. Rex Neapolis neminem publicè misit, ne repudia-

pudiare quædam in eo concilio, aut approbare videretur, quæ noluiſſet. Poſtulabat Reginæ Ungariæ Legatus, ut ne Ducis Mutinenſium, Reique publicæ Genuenſis Legati ad id colloquium adhiberentur, propterea quòd eorum eſſent Legati Principum, qui alieno bellarent nomine: itemque poſtulabat, ut ne Vormaciensis fœderis ſublata cauſa, viſ maneret, in eo-que tantum maneret, quod Reginæ oberat. Nam Placentia, quæ Philippo Hiſpani Regis Fr. contributebatur, & Finario, quod Genuenſibus reſtinuebatur, nominatim exceptis, de reliquis omnibus, quæ Reginæ Ungariæ fuiſſent, atque erant ex Vormaciensi fœdere Sardinia Regi attributa, eidem in Auiſgranenſi colloquio diligenter cavebatur. Id, quod contra omnem pactorum, conventorumque fieri

136 DE BELLO ITALICO,
fieri rationem Caunitius dicebat. Etiam Pontifex Maximus per Canonicum quendam Leodiensem vetustum illud suum in Parmam, Placentiamque Urbes jus interponebat. Erat prætereà inter Auriam, Monsoniumque de suorum Principum dignitate orta contentio, qui primus, qui secundus in exscribendo fœdere nominari deberet. Sed non placuit pacem omnium, ut dicebatur, bono partam contentionibus nonnullorum perturbari; & , compositis Britannorum, Gallorumque rebus, reclamare cæteri, non repugnare poterant.

His in Aquisgranensi colloquio actis, aliud Nicææ colloquium indictum est, in quo de Italicâ firmandâ pace agebatur: apudque Brounium, & Riceliensem, his rebus cognitis, itemque apud Bellinsulanum, Minensem

sem, & Leutronium constitutæ sunt induciæ, quarum quoad exisset dies, perfectave essent ad pacem omnia, suis se quisque locis contineret, neve alter alteri nocere posset. His stare induciis Britanni noluerunt, propterea quòd pactas priùs fuisse dicerent, quàm Hispanos, & Genuenses cum reliquis de Aquisgranensi pace consensisse ipsi cognoscerent. Quod ubi a Britannis cognitum est, mare etiam a belli impetu cessavit, Britannicæque classis Præfectus Navarchum Genuâ misit, qui ejus rei nuncium Senatui perferret, &, quæ est Britannicæ gentis magnitudo animi, Genuensium, tametsi hostes fuissent, tamen virtutem, & constantiam admirari Præfectum diceret.

Interea Genuæ, pace partâ, gratiæ Superis agebantur, indictâ supplicatione, utque ea supplicatio quotan-

138 DE BELLO ITALICO ,
nis iv. id. Decemb. , quo die liberata
ab Austriacis Urbs fuerat , ad Mariæ
in Oreginâ constitueretur , Senatus cen-
suit : Conciliumque Majus extrâ ordi-
nem coactum decrevit , uti Dux Ri-
celiensis , liberi , posterique ejus , at-
que agnati Cives essent nobiles Ge-
nuenses , iisque gentis suæ insigni in-
signe apponere Reipublicæ liceret ,
utque Duci Ricelensi ex S. C. sta-
tua in Curiâ poneretur ex marmore :
itemque Ahumadam Hispaniensis exer-
citus Legatum liberos , posterosque
ejus Cives esse nobiles Genuenses ,
itemque Cives esse nobiles Genuenses
septem , qui populares erant honesto
loco nati , Joannem Baptistam Celestiam ,
Josephum Calvum , Josephum Aspla-
natum , Joannem-Baptistam Carrogium
Georgium Turrellium , Josephum La-
comarsinum , & Augustinum Majo-
lum ,

lum, quòd ii optimè fuerant de Republicâ tempore difficillimo meriti, Patribus placere. Hi posteaquàm conscripti Patres fuerunt, collatione gratuita (nam more receptum est, si quis inter Patres legatur, uti is aliquid Duci muneris offerat) simulacrum ex argento præclaro opere, & grandi pondere, quod Mariam virginali habitu, atque vestitu referebat, Brignolio Duci obtulerunt. Ille statim in publicum contulit, in maximoque Urbis Templo asservari, atque in supplicatione, quæ iv. id. Decemb. haberetur, deferri quotannis iussit. At Rex Galliæ Riceliensem, quòd egregiam Genuensi bello operam navasset, Magistrum creavit Gallicæ militiæ. Quo ille lætus honore, servatæque Urbis Genuæ gloriâ clarus in Galliam rediit.

Indicto Nicææ colloquio con-
nerunt eò statim Brounius, Bellinsu-
lanus, & Minensis, Regis autem Sar-
diniæ nomine Comes Breliensis, at-
que a Republicâ Genuensi missi Con-
stantinus Pinellius, & Hieronymus
Curlus, a Duceque Mutinensium
Comes Sabbatinus, qui de Italicâ
firmandâ pace agerent iis conditioni-
bus, quæ erant jam in Aquisgranensi
colloquio constitutæ, quarum hæc
erat summa: Omnia Sardiniæ Rex ha-
beret, & quæ ante bellum habuisset,
& quæ ex Vormaciensi fœdere rece-
pisset, exceptâ nominatim Placentiâ
ejusque, Urbis agro. Parma, Placentia,
Guardistallum, earumque urbium agri
Philippo Ferdinandi Hispani Regis Fr.
attribuerentur, liberis, posterisque ejus
virilis sexus, eâ tamen lege, si Caro-
lus Neapolis, & Siciliae Rex Philippi,
Fer-

Ferdinandique Fr. in Hispaniam transcat, ut regnet in eâ, & si Philippo Ferdinandi Hispani Regis Fr. liberi, posterique nulli fuerint virilis sexus, tum uti Placentia, ejusque urbis ager ad Regem Sardiniae, Parma, Guardistallum, earumque urbium agri ad Reginam Ungariae eodem jure redeant, quo jure cujusque eorum antea fuerint.

Dux Mutinensium, & Respublica Genuensis restituerentur in integrum: Quæ privatim a Genuensibus bona in regno Reginae Ungariae, quæ item a Duce Mutinensium possessa essent, Reginaque Ungariae jure belli publicasset, ea dominis omnia rectè redderentur: Dux Mutinensium, si pro iis pecuniam accipere velit, æstimatione intra quadragesimum diem factâ, accipiet. Hæc ferè, quæ ad Italiam pertine-

tinerent, Aquisgrani constituta sunt, & Nicææ cautum est in colloquio, uti ad certam diem perficerentur, utque ad certam item diem ex iis locis, quæ quisque occupasset, præsidia deducerentur omnia; Captivi utrinque, factâ permutatione, restituerentur, & nominatim nobiles Cives Genuenses, itemque obsides remitterentur. Sed cum de bonis a Reginâ Ungariæ publicatis controversia esset illata, caput illud Austriaci infirmare conabantur, aut maligniùs interpretando, aut in aliud tempus rei cognitionem differendo. Contrà, ut statim decerneretur, & ab eo, quod erat in Aquisgranensi colloquio de hujusmodi bonis sanctum, ne recederetur, Genuenses, & Ducis Mutinensium Legatus postulabant. Quâ de controversiâ Galliæ Rex certior factus, ne reliquo Belgio, Borboniorum præsidia

sidia deducerentur, imperavit; &, qui communis salutis causâ pacem fecerat, sociorum, & fidei gratiâ bellum renovare non dubitabat, in idque Britanni, & Batavi consentire videbantur. Quibus Regina Ungariæ rebus permota ab hujusmodi etiam postulatione destitit, sedatâque controversiâ, pax tandem omnium consensu firmata est.

Hunc habuit exitum Italicum bellum, de quo scribenti liceat, si verè, in extremo opere Italicorum Principum, qui bellum gesserunt, laudare virtutem. Nam Rex Neapolis, longè a finibus suis rejectis ad Velitras hostibus, egregii imperatoris, optimique Regis officio functus est. Sardinia Rex in dubiis, gravibusque rebus solertiæ, & fortitudinis laudem tulit. Dux Mutinensium insigni ergà Borbonios fide, animique in adversis

144 DE BELLO ITALICO ,
magnitudine inclaruit . Genuenses de-
nique , recuperatâ , defensâque Patriâ ,
fatis magnificè ostenderunt , vetus il-
lud in Italiâ animorum robor sopiri
interdum temporibus , extinguï nun-
quàm posse .



Aricinum nemus, Bois de Genzano.

Ariminum, Rimini, ville.

Apuani montes, Montagnes de lunegiane.

Albintemelium, Ventimiglia, ville.

Aquæ Statellæ, Acqui, ville

*Augusta Batie- Bassignana, village dans
norum, la Laumelline, au conf-
luent du Pô & du Tanaro.*

Agonia, la Gogna, rivière.

*Alpes Cotticæ, les Alpes, qui separent le
Piemonte du Dauphiné.*

*Æmia via, Voie de Rimini jusque à
Plaisance, & Tortone.*

Arx Delphinia, Château de Porto-fino.

Arx Mariana, la Forteresse Sainte Marie.

Antipolis, Antibes, ville.

*Albingaunum, Albengue, ou Albengua, ville
dans l'état de Gènes sur
la côte occidentale.*

Argentium, *Argens*, rivière en Proven-
ce, qui prend sa source
au Marquisat d'Olières,
& se jette dans le Medi-
terrannée près de Frejus.

Allobroges, *Peuples de la Savoye.*

Aqua Sextia, *Aix*, ville.

Arenarium *Subur*, le Fauxbourg de San-
banum, *Pier d'Arena.*

Enobarbus, *le Capitaine Barbarossa.*

Aginnensis Dux *le Duc d'Aginois.*

Balista, *Montagne de la Toscane*
entre Reggio de Mode-
ne, & Luques, vulgo
monte Balestra.

Borussia, *la Prusse.*

Brixellum, *Bersello, ou Bresbello, sur le*
Pò, à 11. lieues de Modene.

Brigan.

- Brigantium*, Briançon, ville.
- Boacum*, Verra, rivière.
- Boji*, les Bavarois.
- Bentinchius*, M. Bentinck.
- Bispiensis Marchio*, le Marquis de Bispi.
- Brignolius-Salius*, M. Brignole-Sale.
- Blonchedius*, M. Blonked.
- Centum Cellæ* Civita-vecchia, ville maritime dans le Patrimoine de S. Pierre.
- Capheronia*, la Carfagnana, Province dans le Modonois.
- Civaron*, Chambery, ville capitale de la Savoye.
- Clavarum*, Chiavari, petite ville dans l'état de Gênes, sur la côte orientale.
- Camposius*, M. de Champeaux.
- Coraphæus*, M. Corafa.

Caralliensis Marchio, le Marqui de Caraglio.

Duccæsius, M. Duché.

Durlacensis, M. Durlach.

Escrius, M. Escher.

Erice, L'Erice, petite ville dans
l'état de Gènes avec un
Port, sur la côte orienta-
le du Golfe de la Spezia.

Falerii Faltscorum, Civita-Castellana, ville.

Flaminia, la Romagne.

Forum Flaminii, Foligni, ville dans l'Om-
bria.

Forum Cornelii, Imola, ville dans la Ro-
magne

Forum Fulvii, Valence, ville capitale
de la Laumelline.

Forum Jutunto- Pizzighittonne, petite ville
rum, dans le Cremonois avec
un beau château.

Forum

Forum Vocontium, Cannes, dans la Proven-
ce au diocèse de Marseille.

Feritor, Besagno, rivière

Fanum Mariae } *Nôtre Dame del Monte.*
Montanae }

Gabellus, Secchia, rivière.

Gallia Narbonensis, Provence, & Languedoc.

Gallia Citerior, Gal- } *la Lombardie.*
lia Cisalpina, }

Guardistallum, Guastalle, petite ville.

Georgiana mensa, la Banque de S. Georges.

Hasta Pompeja, Asti, ville.

Harchesius, le Duc d'Arcos.

Iria, Voghera, ville, & la Scri-
via, rivière.

Ilva, Elbe, ou Elve, Isle d'Is-

chia sur le côte de Tos-

cane, vis-à-vis de Piom-

bino.

<i>Lacus Verbanus,</i>	<i>Lac majeur.</i>
<i>Ligusticae fauces,</i>	<i>la Bocchetta.</i>
<i>Laus Pompeja,</i>	<i>Lodi, ville.</i>
<i>Lerina,</i>	<i>S. Honoré, Isle en Provence.</i>
<i>Luceria,</i>	<i>Luzara, ville.</i>
<i>Ligures Ingauni,</i>	<i>les Peuples d'Alben- gue.</i>
<i>Leucopetra,</i>	<i>le Cap des armes, montagne.</i>
<i>Mare inferum,</i>	<i>Mer de Toscane, & de Naples.</i>
<i>Monæcum,</i>	<i>Monaco, ville.</i>
<i>Masilia,</i>	<i>Marseille, ville.</i>
<i>Mauriacensis Marchio,</i>	<i>le Marquis de Moriac</i>
<i>Montalius,</i>	<i>le Marquis de Montel.</i>
<i>Muniainus,</i>	<i>M. Muniain.</i>
<i>Margaropolis,</i>	<i>S. Marguerite, village dans le Golfe de</i>

Rapallo sur la côte
orientale a 25. mill.
de Gènes.

Mojensis Marchio, le Marquis Moye.

Noalliensis, M. Noailles.

Octoviri, les Protecteurs de la Ban-
que de S. Georges.

Ora circa Oxibios, la côte de Provence.

Octavium, Voltaggio, bourg.

Ocelum, Exilles, petite ville de Pie-
mont avec un fort châ-
teau.

Occitania, Le Languedoc,

Oscensium Dux, le Duc d'Huescar,

Porcifera, Polcevera, riviere.

Planasia, S. Marguerite, Isle en
Provence

Portus Lunæ, seu }
Lunensis } le Port de la Speria.

Re-

Remopolis, S. Remo, bourg sur le côte
occidentale a 80. mill. de
Gênes.

Regium Lepidi, Reggio de Modene.

Sextum, Sestri di Ponente a s. —
milles de Gênes.

Sesbites, la Sesbia, riviere.

Statellates, Peuples d'Acqui.

Scultenna, Panaro, riviere.

Sergianum, Sarzana, ville.

Sergianiolum, Sarzanello, château

Sigesta Tigullio - Sestri di Levante
rum, bourg.

Spero, l'Esperon.

Tridinum, Trino, dans le Monferrat.

Ticinum, Pavie, ville, & Tesino,
riviere.

Tropæa, la Turbie, riviere.

Vadum Sabatium, Golfe de Vadi

Viglebanum,

Vultur,

Vigevano, ou Vigere.

Voltri, bourg.



L I B. I.

ERRATA

CORRIGE

Pag. lin.

viii 15 *hifloria*
 xiv 20 *excollendas*
 13 10 loco ponere
 27 18 obfervarentur
 52 16 procerto
 74 3 MCLXXVI.
 85 7 conctabundæ
 94 21 formiditatis
 122 17 ipfi loci

hifloriam
excolendas
 loco poneret
 obverfarentur
 pro certo
 CLXXIV.
 cunctabundæ
 formidatis
 ipsis loci

L I B. I I.

23 9 abftereretur
 79 3 interriiffent
 104 16 amni

abfterreretur
 interiiffent
 amnis

L I B. I I I.

E R R A T A

C O R R I G E


Pag. lin.

2	16	diremere	dirimere
	19	nequam	ne quàm
4	2	natutæ	naturæ
7	5	Hyeronimum	Hieronimum
8	11	disolvere	dissolvere
12	19	destrâ	dextrâ
17	15	gelluque	geluque
22	14	dirruit	diruit
33	4	Castellâ	Castella
54	7	eo	cò
76	5	descripto	de scripto
78	21	ax	ex
93	12	dari	dare
99	20	qui	quæ
121	14	quo	quò

L I B. I I I. P. I I.

6	1	costantia	constantia
11	17	fidei solertiæque,	fidei, solertiæque
21	5	tyramnidem	tyrannidem
23	21	rextinctus	relinctus
35	21	Ferritorque	Feritorque
40	12	Langentium	Langensium
43	18	Spinulæ	Spinula
52	20	Stajene	Stajeno
118	14	terrestri,	terrestris,
121	10	concilium	consilium
134	19	valeditudinis	valetudinis

UNIVERSITY OF ILLINOIS-URBANA



3 0112 102170708